

佩文齋廣羣芳譜卷第七

穀譜

麥

按大麥小麥統名曰麥原譜尚以小麥爲麥而另列大麥于後今從齊民要術併合爲一

**釋**說文麥芒穀秋種厚埋故謂之麥麥野金王而生

火王而死

**原**

小麥一名來

又作稜爾雅云小麥稜廣雅云來小麥也本草云麥

字從來從夂來象其實夂象其根

苗生如韭成似稻高二三尺實居殼

中芒生殼上生青熟黃秋種夏熟具四時中和之氣兼

寒熱溫涼之性繼絕續乏爲利甚普故爲五穀之貴亦

可春種至夏便收然不及秋種者性有南北之異北地

燥冬多雪春少雨麥晝花薄皮多麩食之宜人南方卑

濕冬無雪春多雨麥受卑濕之氣又夜花食之生熱腹

痛難消亦地氣使然也北麥固佳陳者更良

**增**廣志

鹵水麥

其實大麥形有縫

稅麥

似大麥出涼州

旋麥

三月種八月熟出西方

赤小

麥

赤而肥稀熟出鄭縣

山提小麥

至黏弱以貢御

半夏小麥秃芒麥

齊民要術

云按今世有落麥者秃芒是也

**原**

大麥一名牟

又作麩爾雅云大麥麩廣雅云牟大麥也

本草云麥之苗粒皆大於來故得大名牟亦大也或又作麥班固典引云玄種黃麥之事是也

莖葉與

小麥相似但莖微麤葉微大色深青而外如白粉芒長

殼與粒相黏未易脫小麥磨麪作餅餌食大麥止堪碾

米作粥飯及喂馬用此其所異也性平涼滑膩作飯寬

中下氣煑粥甚滑磨麪作醬甚甘美春秋皆可種他如

穠麥

本草李時珍云穠麥有二種一種類小麥而大一

種類大麥而大又云是大麥中一種皮厚而色青者也唐蕭炳云西川人種食之山東河北人正月種之名曰春穠形狀與大麥相似陳承云作麪脆硬食多脹

人汴洛河北之赤麥廣志云有赤青稞麥本草陳藏器

問又呼為黃稞麥赤色而肥云青稞似大

大小二種似大小麥而粒大皮薄多麩無麩西人種之

黑穰麥見廣志大抵與大麥一類而異種增廣志稷麥

出涼州本草稷麥大麥有黏者名似大麥稷麥可以釀酒

詩鄘風爰采麥矣沫之北矣增鄘風我行其

野芄芃其麥增周頌貽我來牟帝命率育箋武王渡

孟津白魚躍入舟出涘以燎後五日火流為烏五至以

穀俱來此謂貽我來牟疏穀蓋牟麥也原周頌於皇

來牟將受厥明明昭上帝迄用康年增禮記王制夏

薦麥月令孟春之月雪霜大摯首種不入蔡邕章句

太陰干陽雨雪而霜故大傷首種首種謂宿麥也麥以

秋種故謂之首種。季春之月天子乃爲麥祈實。註於

含秀求其成也。孟夏之月農乃登麥天子乃以彘嘗

麥先薦寢廟。註麥之新氣尤盛以彘食之散其熱也。

麥秋至。仲秋之月乃勸種麥無或失時。註麥者接絕

續乏之穀尤重之。疏前年秋穀至夏絕盡後年秋穀夏

時未登是其絕也。夏時人民糧食闕短是其乏也。麥乃

夏時而熟是接其絕續其乏也。內則麥食脯羹雞羹

疏謂以麥爲飯析脯爲羹又以雞爲羹三者味相宜也。

周禮天官雁宜麥。疏雁宜麥者雁味甘平大麥味酸

而溫小麥味甘微寒氣味相成故云雁宜麥。原左傳

隱公三年夏四月鄭祭足帥師取溫之麥。孟子今夫

麩麥播種而耨之其地同樹之時又同淳然而生至於  
日至之時皆熟矣〔家語〕宓子賤爲單父宰齊攻魯道  
由單父單父父老請曰麥已熟矣今齊寇至不及人人  
自收其麥請放民皆使出穫麥可以益糧且不資寇三  
請而宓子賤不聽俄而齊寇逮乎麥季孫聞之怒使人  
讓曰民寒耕熟芸曾不得食可不哀哉猶可有告而不  
聽非所以也宓子賤蹙然曰今茲無麥明年可樹若使  
不耕者得穫是使民樂有寇也且單父得一歲之麥於  
魯不加強喪之不加弱使民有自取之心其創必數世  
不息季孫聞之赧然媿曰地若可入吾豈忍見宓子哉

前漢書食貨志董仲舒說上曰春秋他穀不書至

於麥禾不成則書之以此見聖人於五穀最重麥與禾也今關中俗不好種麥是歲失春秋之所重而損生民之具也願陛下幸詔大司農使關中民益種宿麥令母後時〔註〕師古曰宿麥謂其苗經冬〔後漢書光武本紀〕詔曰久旱傷麥秋種未下朕甚憂之〔原〕後漢書馮異

傳光武至南宮大風雨引車入道傍空舍馮異抱薪鄧禹爇火光武對竈燎衣異進麥飯〔逸民傳〕高鳳少爲

書生家以農畝爲業專精誦讀晝夜不息妻嘗之田曝麥於庭令鳳護雞時天暴雨鳳持竿誦經不覺潦水流麥妻還怪問鳳方悟之後遂爲名儒〔增〕晉書孝友傳

王裒家貧躬耕計口而田度身而蠶或有助之者不聽

諸生密爲刈麥哀遂棄之 庾袞母終服喪居于墓側  
歲大饑藜羹不糝門人欲進飯者而袞每日已食莫敢  
爲設及麥熟穫者已畢而採摭尙多袞乃引其羣子以  
退曰待其間及其摭也不曲行不旁掇跪而把之則亦  
大獲 〔魏書〕樊子鵠傳子鵠除殷州刺史屬歲旱儉子  
鵠恐民流亡乃勒有粟之家分貸貧者并遣人牛易力  
多種二麥州內以此獲安 〔釋老志〕東萊人王道翼少

有絕俗之志隱韓信山四十餘年斷粟食麥 〔隋書〕隱

逸傳張文詡河東人也每以德化人鄉黨頗移風俗嘗  
有人夜中竊刈其麥者見而避之盜因感悟棄麥而謝  
文詡慰諭之自誓不言因令持去經數年盜者向鄉人

說之始爲遠近所悉

〔南史吳明徹傳〕

明徹有粟麥三

千餘斛而鄰里饑餒乃白諸兄與鄉里計口平分同其

豐儉賴以存者甚衆

〔孝義傳〕

沈崇僚母卒葬後更行

服三年久食麥屑不噉鹽酢

〔舊唐書高宗本紀〕

儀鳳

三年五月幸九成宮秋七月宴近臣諸親於咸亨殿上

謂霍王元軌曰去冬無雪今春少雨自避暑此宮甘雨

頻降夏麥豐熟秋稼滋榮

〔玄宗本紀〕

上自於苑中種

麥率皇太子已下躬自收穫謂太子等曰此將薦宗廟

是以躬親亦欲令汝等知稼穡之難也因分賜侍臣謂

曰比歲令人巡檢苗稼所對多不實故自種植以觀其

成且春秋書麥禾豈非古人所重也

〔五代史回鶻傳〕



回鵲地宜白麥青麥麴麥 〔宋史仁宗本紀〕天聖三年

四月癸巳幸御莊觀刈麥聞民舍機杼聲賜織婦茶帛

〔禮志〕太宗景祐三年禮官宗正請每歲夏孟月嘗麥

配以篚 皇祐五年後苑寶政殿刈麥謂輔臣曰朕新

作此殿不欲植花歲以種麥庶知穡事不易也自是幸

觀穀麥惟就後苑 〔汲冢周書〕維四年孟夏王初祈禱

於宗廟乃嘗麥於太祖 〔穆天子傳〕天子西征至于赤

烏之人獻稌麥百載天子西征至于鸚韓氏爰有樂野

溫和稌麥之所草 黑水之阿爰有野麥 〔師曠禽經〕

澤雉啼而麥齊 〔原〕莊子青青之麥生於陵陂 〔繪〕呂

氏春秋今茲美萊來茲美麥 孟夏之昔殺三葉而獲

大麥註昔終也三葉薺芘也葶蘆也薪蕘也見三葉之  
死則大麥可獲之候也淮南子濟水通和而宜麥

春秋佐助期麥神名福習春秋說題辭麥之爲言殖  
也寢生觸凍而不息精射刺直故麥含芒事且立也

說文麩周所受來牟也一麥二牟象其芒刺之形天所  
來也獨斷老扈氏農正趣民收麥原曹瞞傳太祖

嘗出軍行經麥中令士卒無敗麥犯者死騎士皆下馬  
付麥相持於時太祖馬騰入麥中勅主簿議罪主簿對  
以春秋之義罰不加於尊太祖曰制法而自犯之何以  
帥下然孤爲軍帥不可殺請自刑因拔劍割髮以置地

諸葛恪別傳孫權饗蜀使費禕禕停食餅索筆作麥

賦恪亦請筆作磨賦咸稱善焉

**鑑**

秦子孔文舉爲北

海相有母病思食新麥家無乃盜鄰熟麥而進之文舉聞之特賞曰不必來謝但勿盜也盜而不罪者以爲勤於母也

**博物志**

漢武帝時廣陽縣雨麥

五土所宜

黑墳宜麥黍

**玄晏春秋**

衛倫過予言及於味稱魏故

侍中劉子陽食餅知鹽生精味之至也予曰師曠識勞薪易牙別淄澠子陽今之妙也定之何難倫因命僕取糧糗以進予曰麥也有杏李柰味三果之熟也不同子焉得兼之倫笑而不荅退告人曰士安之識過劉氏吾將來家實多故杏時將發糒以杏汁李柰將發又糒以李柰汁故兼三味

**陳留耆舊傳**高式至孝永平中蠶

蝗爲災獨不食式麥

〔西域諸國志〕

天竺十一月六日

爲冬至則麥禾十二月十六日爲臘則麥熟

〔拾遺記〕

樂浪之東有背明之國其國昏昏常暗宜種百穀名曰融澤方三千里五穀皆良食之後天而死有延精麥延壽益氣有昆和麥調暢六府有輕心麥食者體輕有醇和麥爲麴以釀酒一醉累月食之凌冬可袒有含露麥穗中有露味甘如飴 張華爲九醞酒以三薇漬麴蘖蘖出西羌麴出北方北方有指星麥四月火星出麥熟而穫之蘖用水漬麥三夕而萌芽平旦雞鳴而用之俗人呼爲雞鳴麥以之釀酒醇美久含令人齒動若大醉不叫笑搖蕩令人肝腸消爛俗人謂爲消腸酒

〔晉中〕

興畫符健洪第三子健陰圖關中陽使其徒種麥示無  
西意〔水經註〕汶水入萊蕪谷出谷有平丘面山傍水  
土人悉以種麥云此丘不宜植稷黍而宜麥齊人相承  
以植之〔國史補〕竇氏子言家方盛時有奴厚斂羣從  
數宅之資供白麥麪醫云白麪性平由是恣食不疑凡  
數歲未嘗生疾其後有奴告其謬妄所輸麪乃常麥非  
白麥也羣從諸宅一時暴熱皆發〔原〕杜陽雜編元和

八年大軫國貢碧麥形大於中華之麥表裏皆碧香氣  
如稷米食之體輕可以禦風〔增〕孔帖同昌公主出降

賜金麥銀米共數斛此皆條枝國獻 高昌土沃麥皆

再熟〔東坡集〕江湖間有鳥鳴於四五月其聲若云麥

熟卽快今年二麥如雲此鳥不妄言也

**原**東坡詩註

今大內當麥熟時以黃羅帕封賜百官其外題曰麩或云以蜜漬食尤佳

**增**

朱子詩註小說人有中麥毒者

夢紅裳娘子悲歌有一丸蘆葦火吾宮之句

**空同子**

麥種之秋而焦於夏火尅金也麥穗直而芒有兵象焉

**湧幢小品**

洪武初一儒赴召太祖問曰習何經曰業

農太祖曰汝知麥禾之節不同乎對曰禾三節麥四節禾播種於春至秋而獲凡歷三時故三節麥則歷四時始成故四節太祖曰是能知稼穡者卽擢某州知州

木蘭國有三寸之麥

**原**

梧潯雜佩南方四月雨後尙

有餘寒土人謂之麥秀寒按王勃採蓮賦麥雨微涼又

徐陵集亦有麥冷之語

**傳**

**原**

宋蘇軾溫陶君傳石中美字信美中牟人也

本姓麥氏隨母羅氏去其夫而適石因冒其姓始中美之生也其父太卜氏以連山筮之遇師䷗之爻是謂師之革䷰曰生乎土成乎水而變乎火坎以輶之坤以布之釜以熟之口以內之腹以藏之美在其中而暢於四支能者樂之以爲大腹不能者傷之以爲心病衆所說也善莫大焉故因以名字之中美幼輕躁散與物不合得其鄉人儲子之意因使從澄水湯先生游旣熟遂陶而成之爲人白皙而長溫厚柔忍在諸石中最有名儲子因秦故司馬錯李斯子由趙高閻樂並薦於秦王

得與市田蔡甲肥鄉羊奭內黃韓音子俱召見是時王  
方省覽文書日昃未食見之甚喜曰卿等向者安在何  
相見之晚耶未見君子怒如調饑卿等之謂也自是皆  
得進見克上心腹賜爵土更上食典御旦夕召對所獻  
納時或麤踈上未嘗不盡善也秦王以嫪毐事出文信  
侯而遷太后怒恚數日不食中美乘機進諫上說賜爵  
徹侯食溫定陶二縣號溫陶君中美旣被任用凡有造  
作自丞相以下莫不是之其爲人柔和有以塞讒人之  
口故也他日秦王坐朝日旰意有所思亟召中美將虛  
以納之中美不熟計以進其說頗剛鯁志不快之者累  
日有博士單軫說上曰爲其所傷矣宜有以下之卽無



患因進其弟子已升元華於上上意稍平然自是遂疎  
中美不得爲尙食矣中美曰吾爲尙食日夕自謂不素  
餐者今吾與牟生輩皆不得進縱復有用者將誅辱乎  
昔也得克心腹而今也遽不信是有不善我之心雖使  
時或思我彼將不盡矣遂稱疾以侯就第其後子孫生  
郡郭者散居四方自號渾氏扈氏索氏石氏爲四族云

文賦散句

**原**

殷箕子麥秀歌麥秀漸漸兮彼黍離離

漢枚乘七發麥秀漸兮雉朝飛

**增**

魏黃觀疏今年麥

苗雖好臨熟多雨而悉復偃壞小麥畧盡惟穡麥大麥  
頗得半收耳

**原**

晉潘岳射雉賦麥漸漸以擢芒

五言古詩

**增**

唐白居易觀刈麥田家少閒月五月人倍

忙夜來南風起小麥覆隴黃婦姑荷簞食童穉攜壺漿  
相隨餉田去丁壯在南岡足蒸暑土氣背灼炎天光力  
盡不知熱但惜夏日長復有貧婦人抱子在其傍右手  
秉遺穗左臂懸弊筐聽其相顧言聞者爲悲傷家田輸  
稅盡拾此克飢腸今我何功德曾不事農桑吏祿三百  
石歲晏有餘糧念此私自愧盡日不能忘

宋蘇轍遲

往泉店殺麥罷民不耕獲豈利有攸往古人爲我言許  
此亦無妄一冬免鋤犁二麥盈甕盎火老金尙伏雨過  
築塲壤隣家助伯亞蒼耳割榛莽朝陽得終日經歲可  
無恙老夫終病慵長子幸可仗劬勞慎勿厭麩餌家共  
享秋田雨初足已作豐熟想歸來報好音相對開臘釀

七言古詩

**增**

宋蘇軾鴉種麥行霜林老鴉閒無用畦東

拾麥畦西種畦西種得青猗猗畦東已作牛尾稀明年  
麥熟芒攢槩農夫未食鴉先啄徐行俯仰若自矜鼓翅  
跳跟土牛角憶昔舜耕歷山鳥爲耘如今老鴉種麥更  
辛勤農夫羅拜鴉飛起勸農使者來行水〔五禽言〕去  
年麥不熟挾彈規我肉今年麥上場處處有殘粟豐年  
無象何處尋聽取林間快活吟〔蘇轍〕遜往泉城獲麥

少年食稻不食粟老居潁川稻不足人言小麥勝西川  
雪花水磨煮成玉冷淘槐葉冰上齒湯餅羊羹火入腹  
五年隨俗麤得飽晨朝稻米纔供粥兒曹知我老且饑  
觸熱泉城正三伏田家有信呼卽來亭午驅牛汗如浴

吾兒生來讀書史不慣田家爭斗斛今年久旱麥粒細  
及半罷休饒老宿歸來爛熯睚蒼耳來歲未知還爾熟  
百口且留終歲儲貧交強半倉無穀 外孫文九伏中  
入村睚麥春田不雨憂無麥入困得半猶足食伏中一  
睚不得緩旱田倉耳猶難得人言春旱夏當潦入伏未  
保天日好老農經事言不虛防風防雨如防盜外孫讀  
書舊有功五言七字傳祖風旋投詩筆到田舍知我老  
來饑且慵秋田正急車難起汗滴肩頰愧鄰里磨聲細  
轉雪花飛舉家百口磨牙齒食前方丈我所無蒸餅十  
家或有諸孫歸何用慰勤苦烹雞亦有烝葫蘆 張舜  
民打麥打麥彭彭魄魄聲在山南應山北四月太

陽出東北纔離海嶠麥尙青轉到天心麥已熟鵬旦催  
人夜不眠竹雞呼雨雲如墨大婦腰鎌出小婦具筐逐  
上隴先將青下隴已成束田家以苦乃爲樂敢憚頭枯  
面焦黑貴人薦廟已嘗新酒醴雍容會所親曲終厭飫  
勞僮僕豈信田家未入唇盡將精好輸公賦次把升斗  
求市人麥秋正急又秧禾豐歲自少凶歲多田家辛苦  
可柰何將此打麥詞兼作插禾歌 范成大刈麥行梅  
花開時我種麥桃李花飛麥叢碧多病經旬不出門東  
坡已作黃雲色腰鎌刈熟趁晴歸明朝雨來麥沾泥犁  
田待雨插晚稻朝出移秧夜食麩 陸游屢雪二麥可  
望喜而作歌苦寒勿怨天雨雪雪來遺我明年麥三月

翠浪舞東風四月黃雲暗南陌坐看比屋騰歡聲已覺  
有司寬吏責腰鎌丁壯傾閭里拾穗兒童動千百玉塵  
出磨飛屋梁銀絲入釜須寬湯寒醅發劑炊麩裂新麻  
壓油寒具香大婦下機廢晨織小姑佐庖忘晚妝老翁  
飽食笑捫腹林下擊壤歌時康

張孝祥大麥半枯自

浮沉小麥刺水鋪綠針山邊老農望麥熟出門見水放  
聲哭去年泠泠七月雨秋苗不收一粒穀只今米價貴  
如玉併日舉家纔食粥小兒索飯門前啼大兒雖瘦把  
鋤犁晴時種麥畊荒壠正好下秧無稻種

戴復古刈

麥行腰鎌上壠刈黃雲東家西家麥滿門前村寡婦拾

滯穢餽粥有餘炊餅餌我聞淮南麥最多麥田今歲屯

干戈飽飯不知征戰苦生長此方真樂土  
〔王炎麥苗〕  
已有生意掘烏稭者未止  
兒童飯犢女採桑水滿東臯  
耕事忙稻秧半綠麥半黃天許食新餠粥香田父咨嗟  
仍笑語赤地一年今得雨紫蕨有根妻子喜免填溝壑  
棄閭里  
〔王禎芟麥歌〕  
田家食力不食智甞麥年年勤  
種蒔老農八十諳地利暑夏呼兒先曠地再耕再耨土  
華膩手把耒犁知已試土沃不妨投種穧今年已報春  
澤被夏攏苗深如櫛比薰風長養見天意獵獵青旗催  
穉穗纔結稔胞花雪墜赫赫曦輪熾鑽燧儘著精華輸  
至味粒飽芒森密如篲頓失前時浪翻翠豈知真宰調  
元氣化作黃雲表嘉瑞老農眼飽雖自慰且夕却憂風

雨至子婦犇忙事芟器鈔綽翩翩轉雙臂曳籠腰間盈  
復棄急載牛箱夜無寐轉首登塲簇高積風翻日碾半  
猶未已向公門奉新餽麴材和糴凡幾次年餉巡門仍  
語諄夏稅有程今反易自餘宿負如取寄指此有秋爭  
蟻萃一得豈能償百費終歲勤勞一獻歛昨日公堂宴  
寶貴樽俎橫陳混肴馘檀板珠繩按歌吹萬錢不值供  
一醉庖人搓揉出精粹尙喜食新誇餅餌物不天來皆  
力致飽食何人知所自春祈夏薦禮所記報本從來追  
古義但願斯民不畏吏吏不擾民民自遂凡在牧民遵  
此治坐見兩岐歌政異日富困倉均被賜不使老農憂  
歲事

明高啟打麥詞雉雛高飛夏風暖行割黃雲隨



手斷疎莖短若牛毛垂去冬無雪不相疑塲頭負歸日  
色白穗落連柳聲拍拍呼兒打曬當及晴雨來怕有飛  
蛾生臥驅鳥雀非愛惜明年好收供爾食

五言律詩

**增**

宋蘇轍殺麥二首麥幸十分熟雨過三日

霽初晴尙未伏半夜卷重陰細築塲無隙輕推磨有音  
驚聞諸縣水一驟直千金 雨後麥多病庾中蛾欲飛  
不辭終日暑幸脫半年飢潦水來何暴秋田望已微農  
夫愚可念此報定誰非 **陸游種麥墾地播宿麥飯牛**  
**臨野池未能貪佛日正恐失農時矻矻鋤耰力勤勤祝**  
**史辭嘉平得三白吾飽豈無期**

七言律詩

**增**

宋朱子次韻秀野滄波館刈麥貽牟夙昔

但聲歌今見郊園樂事多且喜甌篋符善禱未須蘆服  
擗妖娥霞觴政自誇真一香鉢何須問畢羅我欲賣刀  
來學稼不知還許受屢麼 **原**明申時行麥浪芃芃秀  
色挺來牟片片黃雲似水流風作跳波時隱見雨添新  
漲乍沉浮晴畦錦漾千層穀寒隴濤生四月秋却怪狂  
瀾頻起陸漫教文偉賦中收 **董其昌**太廟薦麥闕宮  
朝敬肅精禋御苑來牟及薦新九葉靈光開大曆雙岐  
瑞穎獻昌辰風迴玉几馨先稷露裛金莖潔似蘋一自  
寢園祈報後於皇清頌遍周民

七言絕句

御製見途中夏麥將熟志喜江潞淮壩道已周歸看東省麥

盈疇雨滋膏潤苗多秀早慶今年大有秋  
清明麥秀清  
明前後麥花香遍野氤氳映驪驪須認秋成春雨密隔溪  
村落飲斜陽

**瞻**宋王珪宮詞六龍觀稼奉宸遊齊賀豐年薦麥秋後  
苑宴回卿相出內官金合送來麩  
王安石陂麥陂麥  
連雲慘淡黃綠陰門巷不多涼更無一片桃花在借問  
春歸有底忙  
范成大出東郊觀麥苗去歲秋霖麥下  
遲臘殘一雪潤無泥相將飽喫滹沱飯來聽林間快活  
啼  
刈麥麥頭熟顆已如珠小阨惟憂積雨餘句我一  
晴天易耳十分終惠莫乘除  
田園雜興高田二麥接  
山青傍水低田綠未耕桃杏滿村春似錦踏歌椎鼓過

清明 [楊萬里] 江山道中麥熟黃雲割露幾肩歸紫玉  
炊香一飯肥却破麥田秧晚稻未教水牯臥斜暉 [麥]  
無邊綠錦織雲機全幅青羅作地衣個是農家真富貴  
雪花消盡麥苗肥 [方岳] 農謠春雨初晴水拍堤村南  
村北鵝鵝啼含風宿麥青相接刺水柔秧綠未齊 小  
麥青青大麥黃護田沙逕遶羊腸秧畦岸岸水初飽塵  
甌家家飯已香 [原] [譚知榮] 麥隴風來翠浪浮霏微小  
雨似深秋野庭終日捲簾坐青樾對啼黃栗留

詩散句

[原]

唐杜甫

崆峒小麥熟

[增]

杜甫

白屋花開裏

孤城麥秀邊

山田麥無隴

春氣晚更生

[韓愈]

南陽

郭門外桑下麥青青

[白居易]

四月未全熟

麥涼江風

秋

元稹年年四五月，鹽實麥小秋。

**原**司空圖綠樹

連村暗黃花，入麥稀。

宋蘇軾登城望牟麥綠浪風掀

舞

**增**陸游但見古河東，壠麥如鋪雪。

金麻九疇野

黃麥初割畦，綠蔬纔灌。

王元粹青青道邊麥，知是誰

家用。

宋石介使麥長，熟人不饑，敢告吾君不須赦。

王安石無端隴上脩脩麥，橫起風寒占作秋。

范純仁

潤催隴麥將黃節，寒阻春蠶趁蚤眠。

唐庚睡外莫聽

泥活活想中已睹麥含含。

陸游京塵日念家山樂况

值腰鎌割麥初，雨畏禾頭蒸耳出，潤憂麥粒化蛾飛。

已過西成賽廟期，家家下麥不容遲。壓車麥穗黃

雲卷，食葉蠶聲白雨來。山村處處晴收麥，鄰曲家家

午曬絲

**楊萬里**

紅紅白白花臨水碧碧黃黃麥際天

**危禎**

麥風翻隴潑濃綠花露滴枝黏老紅

**吳潛**

波亭下繫扁舟輕雨輕寒又麥秋

**盧贊元** 麥秋天氣

朝朝變蠶月人家處處忙

**宋謝朓** 麥候始清和

**齊**

**王僧達** 麥隴多秀色

**邢邵** 風輕麥候初

**周庾信** 麥

隨風裏熟

**陳江總** 麥氣涼昏曉

**唐盧從愿** 蘅臯起

麥涼

**張謂** 秋風麥穗黃

**蕭穎士** 麥秋田野喧

**王**

維雉雉麥苗秀

**杜甫** 微麥早向熟

**原** **杜甫** 細麥落

輕花

青熒陵陂麥

涼州白麥枯

**增** **韓愈** 暖風抽

宿麥

**孟郊** 麥風清冷吹

**李賀** 麥雨漲溪田

**張蠟**

甸麥深藏雉

**宋王安石** 麥漲一溪雲

**蘇軾** 夏旱麴

麥人 [唐庚] 雀飛田有麥 [汪藻] 麥隴如人深 [范成

大麥裏綠叢高 [戴復古] 梯山畦麥秀 [黃公度] 晴添

麥隴黃 [金吳] 激風雨麥秋寒 [元方夔] 山田麥苗肥

[袁桷] 土沃村村麥 [原] 唐李白荊州麥熟繭成蛾

麥隴青青三月時 [贈] 儲光羲 麥涼浮壠雉媒低 [柳

宗元] 麥芒際天搖青波 [李賀] 野家麥畦上新隴 [朱

慶餘] 麥風吹雨正徘徊 [薛逢] 晚麥芒乾風似秋 [薛

能鄰驚麥野聞雛雉 [杜荀鶴] 高下麥田新雨後 [分

開野色收新麥 [宋石介] 麥宜過社猶催種 [原] 歐陽

修 [四月] 田家麥穗稠 [王安石] 晴日暖風生麥氣 [贈]

[蘇軾] 麥熟旋供湯餅新 [王阮] 麗日借黃催麥壠 [范

成大麥雨一犁隨處綠 青黃麥隴平平去 陸游水

面秧青麥半黃 雪花漫漫麥將熟 土膏動後麥苗

長 戴復古 鍛磨鳴時大麥黃 黃公度 乍寒乍煖麥

秋天 金王渥 穀雨連朝沒麥場 宇文虛中 彌隴連

天麥浪寒 麻九疇 筓輿歸路麥花香 元好問 一犁

春雨麥青青 灑灑蒼波麥已勻 元方回 夏前十日

嘗新麥 耶律楚材 萬頃青青麥浪平 馬祖常 滋麥

春膏覆隴齊 謝應芳 天假春晴養麥苗

**別錄** 增 尙書大傳 秋昏虛星中可以種麥 原 種麥 農

政全書 八月白露節後逢上戊爲上時中戊爲中時下

戊爲下時種須簡成實者棉子油拌過則無蟲而耐旱



大約杏多則不蛀宜肥地有雨佳諺云無雨莫種麥又云麥怕胎裏旱又云要喫麩泥裏纏春雨更宜諺云麥收三月雨春間鋤一遍收子多若三春有雨入夏時有微風此大有之年也諺云麥秀風搖初種忌戌日諺云無灰不種麥兩經社日佳以灰糞拌種妙

**雜**

陰陽

書大麥生於杏二百日秀秀後五十日成麥生於亥壯於卯長於辰老於巳死於午惡於戌忌於子丑小麥生於桃二百一十日秀秀後六十日成忌與大麥同蟲食杏者麥貴

**齊民要術**

崔寔曰凡種大小麥得白露節

可種薄田秋分種中田後十日種美田惟穰早晚無常

正月可種春麥豌豆盡二月止

汜勝之書曰凡田有

六道麥爲首種種麥得時無不善夏至後七十日可種宿麥早種則蟲而有節晚種則穗小而少實當種麥若天旱無雨澤則薄漬麥種以酢漿并蠶矢夜半漬向晨速投之令與白露俱下酢漿令麥耐旱蠶矢令麥忍寒麥生黃色傷於太稠稠者鋤而稀之秋鋤以棘柴耨之以壅麥根故諺云子欲富黃金覆黃金覆者謂秋鋤麥曳柴壅麥根也至春凍解棘柴曳之突絕其乾葉須麥生復鋤之到榆莢時注雨止候土白背復鋤如此則收必倍冬雨雪止以物輒藺麥上掩其雪勿令從風飛去後雪復如此則麥耐旱多實春凍解耕如土種旋麥麥生根茂盛莽鋤如宿麥區麥種區大小如中農夫區

禾收區種凡種一畝用子二升覆土厚二寸以足踐之  
令種土相親麥生根成鋤區間秋草緣以棘柴律土壅  
麥根秋旱則以桑落曉澆之秋雨澤適勿澆之麥凍解  
棘柴律之突絕去其枯葉區間草生鋤之大男大女治  
十畝至五月收區一畝得百石以上十畝得千石以上  
大小麥皆須五月六月曠地不曠地而種者其收倍  
薄種大小麥先時逐犁種者佳其山田及剛強之  
地則耬下之凡耬種者匪直土淺易生於鋒鋤亦便穡  
麥非良地則不須種八月中戊社前種者爲上時耬者  
畝用子耬者下戊前爲中時耬者八月末九月初爲下時耬者  
二升半耬者三升耬者一升半耬者中戊前爲中時耬者  
三四耬者八月上戊社前爲上時耬者一升半耬者中戊前爲中時耬者

用子二升下戊前爲下時

用子二升半

正月二月勞而鋤之三月

四月鋒而更鋤

小麥宜下種歌曰高田種小麥穰糝

不成穗

吳下田家志種麥宜庚午辛未辛巳辛卯庚

子庚戌

種樹書

小麥不過冬大麥不過年

麥最宜

雪諺云冬無雪麥不結

種麥之法土欲細溝欲深耙

欲輕撒欲勻曬麥之法宜烈日之中乘熱而收仍用蒼

耳葉或麻葉碎雜其中則免化蛾

臘日種麥及豆來

年必熟麥苗盛時須使人縱牧於其間令稍實則其收

倍多麥屬陽故宜乾原稻屬陰故宜水澤

士農必用

相傳農語云彭祖壽年八百不可忘了植蠶植麥又云

社後種麥爭回耬又云社前種麥爭回牛言奪時之急

如此之甚也

**原**

種塌麥法天生意六月初旬五更時

乘露未乾陽氣在下耕地牛得其涼耕過稀種菜豆候

七月間豆有花犁翻豆秧入地麥苗易茂

**護麥**農桑

撮要防露傷麥但有沙霧將糞麻散拴長繩上侵晨令

兩人對持其繩於麥上牽拽抹去沙霧則不傷麥

**刈**

麥農政全書凡農家所種宿麥早熟最宜早收故韓氏

直說云五六月麥熟帶青收一半合熟收一半若候齊

熟恐被暴風急雨所摧必至拋費每日至晚即便載麥

上場堆積用苫密覆以防雨作如搬載不及即於地內

苫積天晴乘夜載上場即攤一二車薄則易乾碾後一

遍翻過又碾一遍起稽下場揚子收起雖未淨直待所

收麥都碾盡然後將未淨穉稗再碾如此可一日一場  
比至麥收盡已碾訖三之一矣大抵農家之忙無似蠶  
麥古語云收麥如救火

**增**

齊民要術

麥倒刈薄布順

風放火火既著卽以掃帚撲滅仍打之如此者夏蟲不  
生

**原**

貯麥太平御覽麥之爲蝶絲濕也萬物之變皆

有化也止麥之化區之以灰法於伏天曬極乾乘熱覆  
以石灰則不生蟲又以蠶沙和之辟蠹蒼耳或艾曝乾  
剉碎同收亦不蛀若稍濕必生蟲

**增**

齊民要術立秋

前治訖蒿艾箬盛之良以蒿艾閉窖埋之亦佳窖麥法  
必須日曝令乾及熱埋之多種久居供食者宜作劔

清異錄積麥以十辛良下子不得過三辛收潑不得過

三辛上場入倉亦用辛日  
〔農家諺〕雲行北好曬麥

瑞麥

**原**說文天降瑞麥一來二變

**彙考原**後漢書張堪傳堪拜漁陽太守百姓歌曰桑無

附枝麥秀兩岐張公爲政樂不可支  
〔舊唐書〕玄宗

本紀天寶三載三月武威郡上言番禾縣天寶山有醴

泉湧出嶺石化爲瑞麩遠近貧乏者取以給食改番禾

爲天寶縣  
〔宋書符瑞志〕晉武帝太康十年六月嘉麥

生扶風郡一莖九穗是歲收三倍  
〔北齊書〕孟業傳業

遷東郡守以寬惠著其年麥一莖五穗其餘三穗四穗

共一莖合郡人以爲政化所感  
〔宋史樂志〕端拱初諸

州麥兩穗三穗者連歲來上有司請以為瑞麥之曲薦

於朝會用之 **五行志**皇祐三年五月彭山縣上瑞麥

圖凡一莖五穗者數本帝曰朕嘗禁四方獻瑞今得西

川秀麥圖可謂真瑞矣其賜田夫束帛以勸之 **遼史**

聖宗本紀統和二十年十二月南京平州麥秀兩岐

**金史五行志**宣宗興定元年四月陳州商水縣進瑞麥

一莖四穗開封府進瑞麥一莖三穗二莖四穗 **原前**

涼錄末嘉三年嘉麥一莖九穗生於姑臧 **繪**孔帖梁

宋州節度使友諒進瑞麥一莖三穗太祖怒曰宋州大

水何用此為 **原**西安志宣德中嘉麥生茂陵一莖九

穗 **新城志**天啟四年嘉麥生王氏田中一莖五穗



**表** 唐崔融爲皇太子賀嘉麥表伏見雍州司馬

徐慶稱所部有嘉麥一莖六穗纖芒濯露疑因黑壤之  
宜香稼搖風若吐黃金之色豈非靈心昭應睿德感通  
降之自天何必來牟之詠嘗之於廟先符孟夏之時凡  
在含生相趨動色臣謬當居守肅奉宗禋一穗兩岐徒  
說張君之詠十畝千石方輕汜氏之書仰天意而增歡  
顧人心而載躍無任嘉怍之至

狀 宋秦觀代蔡州進麥瑞圖狀勘會本州自春已來  
屢得雨澤已於某月日具狀奏聞訖今來二麥並已成  
熟地無高下所收斗斛數倍當年及諸縣節次申送致  
麥苗有一莖二穗或三穗其多有至五穗者甚多父老

等皆云數十年無此豐熟亦未嘗見有麥苗一莖至數  
穗者以此見臨御以來功化日新利興害去善氣克塞  
致此嘉應臣待罪郡守目睹其事不敢隱默謹畫成圖  
子一本隋狀上進以聞

**頌**

明李東陽瑞麥頌并序瑞麥頌豐年也和氣旁達

嘉麥效祥頌聲作焉以麥上德昭農事也維田有麥載  
被其隴旣堅旣實岐岐總總我塲我隴其積如踊皇德  
斯播於植於動維此瑞麥曰帝之寵 維麥在田載耕  
載糶朕我手足劬我耜鋤以夕以朝中心孔怙載拊而  
謳於歲之秋曰茲豐年維我民勞 天監帝德亦念民  
阻噓以和風渥以甘雨貽我嘉麥及我穀黍維年之祥

祈不我拒以徧率土於天之下於天之下永荷皇嘏

**賦**

唐任瑗瑞麥賦建極惟皇昭鑠於光出豫考卜乘

時省方西自鄴鎬東巡洛陽順天遊而有慶緬日晷之  
云長徵賢宣室布政明堂風雨時序黎庶其康盡物稱  
瑞窮靈委祥明含日月則階奠恒秀澤及草木而隴麥  
登芳於是闕離宮通禁苑覩茲瑞之所應實皇恩之燭  
遠朝任得人時唯賢相九流分職三旗協亮稱堯舜之  
允敷同益贊而爲唱曰珍瑞麥生我皇國凌寒而秀彰  
聖之德願載東觀之書以歌南薰之則旣而帝曰欽哉  
天符聿來俾予光於四表惟爾翼於中台念幽芳之遂  
性知棫樸之當材且夫麥之爲瑞其德至矣居寒自生

當暑薦美含實珠淨耀芒鋒起既標詠於詩人亦稱奇於縑史當其芄芄於野漸漸其秀將嗣穀以登年豈凌霜而不茂在昔唐叔嘉禾伊育昭彼周王天人斯穆今惟聖帝此焉攸淑涵之如春也及晝而繁榮就之如日也來牟而紛郁則有小儒怡然鼓腹照水鏡之光鑒參歷選之題目未登高而賦成庶陳美於金竹者也

高 敷庭瑞麥賦 聖人順動文思欽明天地貞觀品物咸亨去憑虛而就安處而周洛而背咸京雲旗電發霜戟林行太陰用事其日在斗萬國來庭百神奔走泉潛動而菱落水益壯而冰厚冠異氣於繚垣吐嘉蕤於寒藪不忌風雪全抽兩穗通日月之光華得雲雨之攸利芒纖

纖而擢隴葉青青而聳翠同黍谷之移暄類榆林之因  
地瑞紀增煥嘉禾異植出天苑之稱奇訪人寰而未識  
凌玉霜而表勁挺金莖而孤植顧耀穎於年和望生成  
於地力倬彼藩翰其代天工卽漢庭之相國類晉室之  
清道拜殊祥而北首列圖史於南宮紆粹容於有穆冠  
鴻業而無窮實穎實粟是崇是奉可以爲瑚璉之資可  
以爲種稂之種偉長至之馭序同少陽之在候成粒貴  
於鳥銜覆苗期於雉雛夫瑞也百王之珍事其生也二  
儀之大德道泰則稱物呈形政乖則羣方皆忒伊小草  
之何幸逢大人之允塞願均照於離明祈作禎於王國

樂章

禮

宋史朝會樂章芄芃嘉麥擢秀分岐甘露夕灑

惠風晨吹良農告瑞循吏稱奇歸美英主折而貢之

七言律詩

**[增]**

范成大次韻袁起巖瑞麥此麥兩岐已黃

熟其間又出一青枝亦已秀實傳記所未載也民和神  
福固其宜况有仁先四者施吳稻卽看收再熟周牟先  
已秀雙岐薰風半老黃金穗梅雨重春綠玉枝樂不可  
支聊發詠田間日日是芳時

五言排律

**[源]**

唐鄭畋詠麥穗兩岐聖慮憂千畝嘉苗薦

兩岐如雲方表盛成穗忽標奇瑞露縱橫滴祥風左右  
吹謳謠連上苑化日遍平陂史冊書堪重丹青畫更宜  
願依連理樹俱作萬年枝 **[張聿詠瑞麥瑞麥生堯日  
芄芄雨露偏兩岐分更合異畝穎仍連冀獲明王慶寧**

惟太守賢仁風吹靡靡甘雨長芊芊聖德應多稔皇家  
配有年已聞天下泰誰爲濟西田

詩散句增宋夏竦似法陰爻呈六穗或符陽數效三岐

唐李嶠瑞麥兩岐秀白居易岐秀麥分花

雀麥

增爾雅蕎麥雀麥註卽燕麥也本草雀麥一名杜姥草

一名牛星草

李時珍曰此野麥也燕雀所食故名曰華本草謂此爲雀麥非矣

蘇恭曰

在處有之生故墟野林下苗葉似小麥而弱其實似穞  
麥而細周憲王曰燕麥穗極細每穗又分小又十數個  
子亦細小

彙考增唐書劉禹錫傳禹錫由和州刺史入爲主客郎

中復作遊玄都觀詩且言始謫十年還京師道士植桃  
其盛若霞又十四年過之無復一存唯兔葵燕麥動搖  
春風耳以詆權近 博物志食鸞麥令人骨節斷解  
丹鉛錄范文正公安撫江淮進民間所食烏昧草乞宣  
示六宮傳諸戚里以抑奢侈烏昧草卽今之野燕麥淮  
南謂麥曰昧故史從音爲文 燕麥滇南霑益一路有  
之土人以爲朝夕常食非虛名也

### 蕎麥

**原**

蕎麥一名莖麥一名烏麥一名花蕎

莖弱而翹然易長易收磨麪如

麥故曰蕎曰莖而與麥同名也俗亦呼翻蕎以別苦蕎

南北皆有之立秋前後下

種密種則實多稀則少八九月熟性最畏霜宜早種遲



則少收苗高一二尺莖空而赤葉綠如烏臼樹葉開小白花甚繁密花落結實三稜嫩青老則烏黑性甘寒無毒降氣寬中氣盛有濕熱者宜之若脾胃虛弱者不宜多食難消煮熟日中曝開口春取米可作飯磨爲麪滑膩亞於麥麪北人作煎餅及餅餌日用以供常食農人以爲禦冬之具南人但作粉餌食和猪羊肉熟食不過十餘頓卽患熱風忌同黃魚食

**蕎麥**

宋史禮志太宗景祐三年禮官宗正請每歲秋

季月嘗豆嘗蕎麥後山談叢穎諺曰黃鵲口噤蕎麥

斗夏中候黃鵲不鳴則蕎麥可廣種也水南翰記蕎

麥字韻書無之道藏有藥石爾雅唐元和間梅彪所集

諸藥隱名以粟黍蕎麥豆爲五弟

高昌行紀高昌地

產五穀惟無蕎麥

**集藻**

七言古詩

**增**

宋陸游蕎麥熟刈者滿野喜而有作

城南城北如鋪雪原頭家家種蕎麥霜晴收歛少在家  
餅餌今冬不憂窄胡麻壓油油更香油新餅美爭先嘗  
獵歸熾火燎雉兔相呼置酒喜欲狂陌上行歌忘惡歲  
小婦紅妝穗簪髻詔書寬大與天遙逐熟淮南幾誤計  
詩散句 **增** 唐溫庭筠日暮鳥飛散滿山蕎麥花 **宋戴**

敏頗動詩人興滿園蕎麥花

唐白居易獨出門前望

野出月明蕎麥花如雪

宋范成大落日青山都好在

山間蕎麥滿芳洲

陸游麤熟山僧分餽船來溪友

餉薪樛

唐白居易蕎麥鋪花白

宋韓琦雲鋪蕎麥

花漫野

陸游滿村蕎麥正離離

暖日暉暉秀蕎麥

未收蕎麥怯新霜

金王良臣蕎麥花冉冉蜜脾香

元貢奎路轉滿川蕎麥花

**增**

齊民要術凡蕎麥五月耕經三十五日草爛得

轉并種耕三遍立秋前後皆十日內種之耕地三遍卽三重著子下兩重子黑上一重子白皆是白汁滿飽如濃卽須收刈之但對稍搭鋪之其白者日漸盡變爲黑如待上頭總黑半已下黑子盡落矣

附錄苦蕎麥

原苦蕎麥出南方春社前後種之莖青多枝葉似蕎麥

苦蕎麥 苦蕎麥 苦蕎麥

而尖花帶綠色實亦似蕎麥而稜角不峭味苦磨爲粉蒸使氣餽滴去黃汁乃可爲糕餌色如猪肝穀之下品

瞿麥

**增**爾雅大菊蘧麥註一名麥句蘧卽瞿麥 **廣雅**苳菱

麥句蘧蘧麥 **本草**瞿麥一名巨句麥一名大蘭一名

地麩陶弘景云今出近道一莖生細葉花紅紫赤可愛子頗似麥故名瞿麥

**別錄****增**齊民要術種瞿麥法以伏爲時一各地麩良地畝用子五升

薄田三四升畝收十石渾蒸曝乾春去皮米全不碎炊作餐

甚滑細磨下絹筴作餅亦滑美然爲性多穢一種此物數年不絕耘鋤之功更益劬勞

佩文齋廣羣芳譜卷第七



佩文齋廣羣芳譜卷第八

穀譜

稻

**原**

稻一名稌有稷

與稊同

有糯

與稊同爾雅云稌稻註云今沛國呼稌疏云案說文

云沛國謂稻為糯稊稻屬也字林云糯黏稻也稊稻不黏者本草以稊米稻米為二物稊古稊字然稊糯甚相類黏不黏為異耳本草云黏者為糯不黏者為稊糯者糯也稊者稊也又云稻稌者稊糯之通稱本草則專指糯以為稻也其性黏軟故謂之糯 堪作飯作粥南方以為常食北方以

為佳品禮記祭宗廟之禮謂稻為嘉蔬周禮地官有稻

人漢有稻田使者蓋通稊糯而言也稊之熟也晚謂之

晚稻稊之小者謂之秬秬熟早謂之早稻有早中晚三

熟水旱二類南方土下泥塗多宜水稻北方地平惟澤

...

土宜旱稻種類甚多

**增**本草孟詵曰淮泗之間最多

襄洛土稷米亦堅實而香南方多收火稻李時珍曰西南夷有燒山地爲畝田種旱稻者謂之火米真臘有水稻高丈許隨水而長

**原**其穀之紅白大小不同芒之

有無長短不同米之堅鬆赤白紫烏不同味之香否軟

硬不同性之溫涼寒熱不同大要北粳涼南粳溫赤粳

熱白粳涼晚白粳寒新粳熱陳粳涼葉與粳似小麥穗

似大麥稈與實不相黏溫中益氣止煩渴和腸胃合芡

實作粥益精強志聰耳明目其類爲香粳

一名香子粒小色斑以三

五十粒入他米數升炊之芬芳香美

小香稻赤芒白粒其色如玉食之香美凡享奠延賓以爲上品出

中雪裏棟粒大色白稈軟而有芒

三穗子一穗三百餘粒出湖州

箭子粒細長而





黃稻黃陸稻豫章青赤芒

白米

青甲等稻未可枚舉

本草秬稻一名占稻

種出占城國故名

似粳而粒小各處有之

品類亦多有赤白二色與粳大同小異

理生玉鏡自

占城來作飯差硬宋氏使占城珍寶易之以給於民者

六旬稻

一名拖犁歸粒小色白四月種六月熟又有八月種赤毘陵亦有六月種八月種

而無芒七八月熟其味白淡而紅甘

烏秬

粒大而芒長

織履飯之香美浙中以供賓客及老疾孕婦三月種七月收其田以蒔晚稻可再熟

廣志粳有

烏粳黑穰青幽白夏之名

齊民要術案今世有尾紫

稻青杖稻飛青稻赤甲稻烏陵稻白地稻孤灰稻

原

糯稻一名秣稻苗葉莖穗與粳稻同

增

本草宋馬志

曰秣稻米卽糯米也其粒大小似秬米宋寇宗奭曰今

造酒糯米也其性溫故可爲酒明李時珍曰南方水田  
多種之其性黏穀殼有紅白二色或有毛或無毛米亦  
有赤白二色 **原**米可炒食可釀酒可熬飴可作粢可  
煮糕可蒸糕水稻赤色者酒多糟少一種粒白如霜長  
三四分性黏滯難化多食令人身軟擁諸經絡氣發癰  
疽瘡癤中痛合酒食醉難醒小兒及病人最忌孕婦雜  
肉食之令子不利小貓犬食之脚屈不能行馬食之足

重其類爲蘆黃糯

一名泥裏變言不待日曬也粒大色白芒長熟最早其色易變釀酒最佳

金釵糯

粒長而釀酒倍多

烏香糯

色烏氣香 秬糯 一名趕陳糯一名

稔有芒四月熟 小娘糯

不耐風水四月熟 青稈糯 稔黃芒赤已

種七月熟 最宜良田四熟

矮糯

一名矮兒糯尖大而熟 硃砂糯 一名臘

長而穀多白斑羊脂糯色白性軟五月種十月熟虎皮糯白斑五月種十月熟

鐵梗糯稈硬而堅馬踪糯芒如馬騾色赤秋風糯一名購官糯一名冷粒糯粒圓白而

稈黃大暑可刈易種多收農人喜種之飯則糯釀則粳糶則減價多以代粳輪租  
**增**齊民要

術秣稻有九格秣雉木秣大黃秣常秣馬身秣長江秣

惠成秣黃滿秣方滿秣虎皮秣蒼奈秣

**彙考**原詩商風十月穫稻 **增**周頌豐年多黍多稌傳

稌稻也 禮記王制冬薦稻月令季秋之月天子乃

以犬嘗稻先薦寢廟 周禮地官稻人掌稼下地以漑

畜水以防止水以溝蕩水以遂均水以列舍水以澮瀉

水以涉揚其芟作田凡稼澤夏以水殄草而芟蕪之澤

草所生種之芒種旱暵共其雩斂註澤草之所生其地

可種芒種芒種稻麥也稻人共雩斂稻急水者也疏以下田種稻麥故曰稼下地但水鍾曰澤有水及鹹鹵皆不生草卽不得芒種故曰草所生餘官不言共雩斂于此官特言共者以稻是水穀急須水故旱時特使共雩之發斂也 夏官東南曰揚州其穀宜稻 正南曰荊州其穀宜稻 左傳邠人藉稻註其君自出藉稻蓋履行之疏服虔云藉耕種於藉田也 戰國策東周欲爲稻西周不下水東周患之蘇子謂東周君曰臣請使西周下水可乎乃往見西周之君曰君之謀過矣今不下水所以富東周也今其民皆種麥無他種矣君若欲害之不若一爲下水以病其所種下水東周必復種稻種

稻而復奪之若是則東周之民可令一仰西周而受命

於君矣西周君曰善〔史記夏本紀〕令益與衆庶稻可

種卑濕後漢書郡國志廣陵郡有長洲澤吳王濞太

倉在此注縣多麋博物記曰千百爲羣掘食草根其處

成泥名曰麋畷民人隨此畷種稻不耕而獲其收百倍

〔張堪傳〕堪拜漁陽太守開稻田八千餘頃勸民耕種

以致殷富魏志夏侯惇傳惇復領陳留濟陰太守時

大旱蝗蟲起惇乃斷太壽水作陂身自負土率將士勸

種稻民賴其利吳志鍾離牧傳牧少居永興躬自墾

田種稻二十餘畝臨熟縣民有識認之牧曰本以田荒

故墾之爾遂以稻與縣人縣長聞之召民繫獄欲繩以

法牧爲之請長曰君慕承宮自行義事僕爲民主當以  
法率下何得寢公憲而從君耶牧曰此是郡界緣君意  
顧故來斃住今以少稻而殺此民何心復留遂出裝還  
山陰長自往止之爲釋繫民民慙懼率妻子春取稻得  
六十斛米送還牧牧閉門不受民輸置道旁莫有取者  
牧由此發名

〔晉書陶侃傳侃嘗出遊見人持一把未

熟稻侃問用此何爲人云行道所見聊取之爾侃大怒  
曰汝旣不佃而戲賊人稻執而鞭之是以百姓勤於農  
殖家給人足

〔原〕晉書孝友傳孫晷吳國富春人年饑

穀貴人有生刈其稻者晷見而避之須去而出旣而自  
刈送與之

〔隱逸傳〕郭翻居貧無業欲墾荒田先立表

題經年無主然後乃作稻將熟有認之者悉推與之縣

令聞而詰之以稻還翻翻遂不受

**增**晉書藝術傳幸

靈者豫章建昌人父母常使守稻羣牛食之靈見而不  
驅待牛去乃往理其殘亂者其父母見而怒之靈曰夫  
萬物生天地之間各欲得食牛方食奈何驅之父愈怒  
曰卽如汝言復用理壞者何爲靈曰此稻又欲得終其  
性南齊書孔琇之傳琇之補吳令有小兒年十歲偷  
刈鄰家稻一束琇之付獄治罪或諫之琇之曰十歲便  
能爲盜長大何所不爲縣中皆震肅南史范雲傳文  
惠太子嘗幸東田觀穫稻雲時從文惠顧雲曰此刈甚  
快雲曰三時之務亦甚勤勞願殿下知稼穡之艱難無



狗一朝之宴逸也。〔陳伯之傳〕伯之年十三四好著獾

皮冠帶刺刀候鄰里稻熟輒偷刈之常爲田主所見呵  
之曰楚子莫動伯之曰君稻幸多取一擔何苦田主收  
執之因拔刀而進曰楚子定何如田主皆反走徐擔稻  
而歸。〔原〕南史隱逸傳晉陶潛爲彭澤令公田悉令種

秣稻妻子固請種粳乃使二百五十畝種秣五十畝種  
粳。顧歡家貧父使田中驅雀歡作黃雀賦而歸雀食  
稻過半父怒欲撻之見賦乃止。〔增〕新唐書郭元振傳

元振爲涼州都督遣甘州刺史李漢通關屯田盡水陸  
之利稻收豐衍。〔于頔傳〕頔爲湖州刺史部有湖陂異  
時溉田三千頃久廢廢頔行縣命復修隄闕歲獲秬稻

蒲魚無慮萬計

李百藥傳

百藥七歲能屬文父友陸

又等共讀徐陵文有刈琅邪之稻之語歎不得其事百

藥進曰春秋邴子籍稻杜預謂在琅邪客大驚號奇童

南蠻傳環王稻歲再熟

泮柯無城郭土熱多霖雨

稻粟再熟

墮婆登在環王南種稻月一熟

宋史仁

宗本紀慶曆四年五月幸玉津園觀種稻

禮志紹興

七年七月張浚等言雨澤稍愆乞禱上曰朕患不知四

方水旱之實宮中種稻兩區其一地下其一地高高者

其苗有稿意矣須精加祈禱以救旱暵

景德四年十

月二十九日詔皇太子宗室近臣諸帥赴玉宸殿翠芳

亭觀稻賜宴仍以稻分賜之

食貨志

言者謂江北之

民雜植諸穀江南專種秔稻雖土風各有所宜至於參  
植以防水旱亦古之制於是詔江南兩浙荆湖嶺南福  
建諸州長吏勸民益種諸穀江北諸州亦令就水廣種  
秔稻並免其租 江南兩浙荆湖嶺南福建土多秔稻  
須霜降成實自十月一日始收租 大中祥符四年帝  
以江淮兩浙稍旱卽水田不登遣使就福建取占城稻  
三萬斛分給三路爲種擇民田高仰者蒔之蓋早稻也  
內出種法命轉運使揭榜示民後又種於玉宸殿帝與  
近臣同觀畢刈又遣內使持於朝堂示百官稻比中國  
者穗長而無芒粒差小不擇地而生 〔山海經箕尾之  
山其神狀皆鳥身而龍首其祀之禮糝用稌米〕註稌稌

稻也 廣漠之都后稷葬焉爰有膏稻註言味好滑如

膏淮南子江水肥仁而宜稻 稻生於水而不能生

於湍瀨之流伏虔古今注惠帝三年桂宮陽翟俱雨

稻米春秋說題辭稻之爲言藉也稻冬含水盛其德

也故稻太陰精含水漸渑乃能化也江旁多稻固其宜

也原孝經援神契汗田宜稻蔡邕月令十月穫稻

人君嘗其先熟故在季秋九月熟者謂之半夏稻增

括地志自崑崙山以南多是平地而下濕土肥良多種

稻歲四熟留役馳馬米粒亦極大會稽典錄夏香有

盜刈稻者香助收之盜慙送以還香香不受博物志

下泉宜稻華陽國志江州縣北有稻田出御米風

土記穰稻之青穠米皆青白也 原抱朴子南海晉安

有九熟之稻

增拾遺記樂浪之東有背明之國在扶

桑之東見日出於西方其國昏昏常暗宜種百穀名曰融澤方三千里五穀皆良食之後天而老有浹日之稻種之十旬而熟有翻形稻言食者沒而更生天而有壽有明清稻食者延年也清腸稻食一粒歷年不饑 原異物志交趾稻夏熟農者一歲再種 安成記安成郡毛亭田疇膏腴厥稻馨香飯若凝脂 淵明別傳淵明嘗聞田水聲倚杖久聽歎曰秫稻已秀翠色染人時剖胸襟一洗荆棘此水過吾師丈人矣 增世說簡文見田稻不識問是何草左右荅是稻簡文還三日不出云

寧有賴其末而不識其本 水經注九真太守任延始

教耕犁俗化交土風俗象林知耕以來六百餘年火耕  
水耨法與華同名白田種白穀七月大作十月登熟名  
赤田種赤穀十二月作四月登熟所謂兩熟之稻也

述異記大禹時天雨稻古詩云安得天雨稻飼我天下

民 廣雅稻穗謂之禾稻已割而復抽曰稻孫 原西

域記天竺國土溽熱稻歲四熟 摩揭院有異稻巨粒

號供大人米 增唐曆開元十九年揚州奏糴生稻二

百一十五頃再熟稻一千八百頃其粒與常稻無異

酉陽雜俎鄴都稻名重思其米如石榴子粒稍大味如

菱杜瓊作重思賦曰霏霏春暮翠矣重思雲氣交被嘉

穀應時 **原** 偽越外紀 稻一年再熟今浙江溫州稻一

歲兩種廣東又有三種田地氣暖故也 **續仙傳** 唐謝

玄卿遇神仙設龍睛稻 **增** 東坡雜記 黎子雲言海南

秣稻率三五歲一變頃歲儋人最重鐵脚糯今歲乃變

爲馬眼糯草木性理有不可知者 **中吳紀聞** 紅蓮早

稻自古有之陸魯望詩云遙爲曉風吟白菊近炊早稻

識紅蓮 **三柳軒雜識** 五穀以稻爲貴古人各以其類

配之如以殺雞配爲黍謂野人之餐也以啜菽配飲水

謂貧者之孝也以蔬食對菜羹謂貶降之食也惟食稻

則對衣錦又祭祀以稻爲嘉蔬公享大夫則以爲吉饈

是五穀以稻爲貴也 **椒宮舊事** 成穆貴妃孫氏參政

孫英之妹嘗與上登香雲閣觀後苑刈稻上命宮人取酒來爲賞豐飲令妃誦詩侑酒妃爲歌李紳憫農詩上大悅賜予有加

戒菴漫筆稻花白而瓣少者米賤多

而色黃則貴俗云銀花賤金花貴也

奎瀛勝覽舊港

土沃人稠地宜稼穡諺云一季種田三季收稻言收穫廣也

海槎餘錄黎俗四五月必集衆斫山木縱火燒

盡上下尺餘亦且熱透徐徐鋤轉種旱稻曰山禾米粒大而香可食連收三四熟

湧幢小品暹羅國稻其粒

盈寸

燕山叢錄房山縣有石窩稻色白味香美以爲

飯雖盛暑經數宿不餲

原

一統志雷陽界稻十一月

下種揚雪耕耘次年四月熟與他地迥異 稻花午開



暮合開合皆於日中香甚有至七開七合者

**集藻啓增**

梁庠肩吾荅湘東王賚稞米啓竊以農夫力

耕時逢儉歲疎賤時澤必取豐年秌斛瀉珠嘉聞陶量

翻庭委玉欣見馬圖

又出梁國之

關

租兼水陸之殊

品伊尹說而不至石崇豪所未及遇處默之得賓同苻

朗之舉箸長河可塞上德無酬

又味重新城香踰滂

水連舟入浦似彥伯之南歸積地爲山疑馬援之西至

不待候沙同新渝之再熟無勞拜石均遼倉之重滿前

恩未遠次渥仍流墨翟假以故書裴楷慙其國賜

謝

東宮賚稞米啓渚水鳴蟬香聞七里瓊山合穎租歸十

縣肩吾人慙振藻徒降人間之松職濫更繁空撤家丞

之俸成珠委地事重逢仙游玉爲糧珍踰入楚雖復激  
水滄流不待監河之說春風掃地方誦文學之篇

**書****增**魏文帝與朝臣論秔稻書江表惟長沙名有好米

何得比新城秔稻耶上風吹之五里聞香 宋蘇軾與

弟子山書或爲予言草木之長常在昧明間早起伺之

乃見其拔起數寸竹筍尤甚夏秋之交稻方含秀黃昏

月出露珠起於其根纍纍然忽自騰上若推之者或綴

於莖心或綴於葉端稻乃秀實驗之信然此二事與子

由養生之說契故以此爲寄

**贊****增**晉湛方生庭前植稻苗贊  
蓓蓓嘉苗離離階側弱

葉繁蔚圓株疎植清流津根輕露濯色

文賦散句

**增**

漢張衡南都賦若其厨膳則有華薌重柜

溼臯香秔

鄭玄婚禮謁文秔稻馥芬婚禮之珍

袁

淮觀殊俗河內青稔新成白稔

晉左思吳都賦國稅

再熟之稻

宋蘇軾與李公擇書軾見在東坡作陂種

稻勞苦之中亦自有樂事

五言古詩

御製秋日出郊觀稼秋氣日寥迴萬象皆蒼蒼朝暾被渥露

草木含晶光西成方屆候農事將築塲於焉省斂穫令典  
重百王輕軒屏前置夙駕無嚴裝郊原一以眺煙樹紛成  
行微風散深樾清流抱迴塘土脈秀且沃篝車鬱相望新  
鎌粲如月刈此溪雲黃拮拾復何幸遺秉滿道旁鳥雀互

翔集婦子咸悅康行將吹葦箏報爾千斯箱眷言三時勤  
艱難詎可忘茫茫視九壤豈盡歌豐穰二鬴苟不充予飢  
怒如傷幸茲樂有年時若雨與暘曷哉慎所麗田功庶無  
荒

**增**晉陶潛庚戌歲九月中于西田穫稻人生歸有道衣  
食固其端孰是都不營而以求自安開春理常業歲功  
聊可觀晨出肆微勤日入負禾還山中饒霜露風氣亦  
先寒田家豈不苦弗獲辭此難四體誠乃疲庶無異患  
于盥濯息簷下斗酒散襟顏遙遙沮溺心千載乃相關  
但願常如此躬耕非所歎 **原**唐杜甫行官張望補稻  
畦水歸東屯大江北百頃平若按六月青稻多千畦碧

泉亂插秧適云已引溜加溉灌更僕往方塘決渠當斷  
岸公私各地著浸潤無天旱主守問家臣分明見溪伴  
芊芊炯翠羽剡剡生銀漢鷗鳥鏡裏來關山雪邊看秋  
菰成黑米精鑿傳白粲玉粒足晨炊紅鮮任霞散終然  
添旅食作苦期壯觀遺穗及衆多我倉戒滋蔓 〔秋行〕  
官張望督促東渚刈稻向畢清晨遣女奴阿稽豎子阿  
段往問東渚雨今足佇聞稷稻香上天無偏頗蒲稗各  
自長人情兒非類田家戒其荒功夫競搨搨除草置岸  
傍穀者命之本客居安可忘青春具所務勤墾免亂常  
吳牛力容易並驅動莫當豐苗亦已穢雲水照方塘有  
生固蔓延靜一資隄防督領不無人提攜頗在綱荆揚

風土暖肅肅候微霜尚恐主守疎用心未甚臧清朝遺  
婢僕寄語踰崇岡西成聚必散不獨陵我倉豈要仁里  
譽感此時世忙北風吹蒹葭蟋蟀近中堂荏苒百工休  
鬱紆遲暮傷

**增**

李觀穫稻朝陽過山來下田猶露濕

餉婦念兒啼逢人不敢立青黃先後收斷折僂佻拾鳥  
鼠盈官倉新租喜復入

**陸游**

稻陂白水滿稻陂投種

未三宿新秧出水面已作纖纖綠年來殘俸絕所望在  
一熟見之喜欲舞不復憂半菽想當西成時載重壓車  
軸病齒幸已勞往矣分社肉

**代鄉鄰作插秧歌**浸種

二月初插秧四月中小舟載秧把往來疾于鴻吳鹽雪  
花白村酒粥面濃長歌相贈答宛轉含飮風日暮飛漿

歸小市鼓鼙鼙起居問尊老勤儉教兒童何人采此語  
爲我告相公不必賜民租但願年屢豐  
〔元趙孟頫題〕  
耕圖正月田家重元日置酒會鄰里小大易新衣相戒  
未明起老翁年已邁含笑弄孫子老嫗惠且慈白髮被  
兩耳杯盤且羅列飲食致甘旨相呼團欒坐聊慰衰莫  
齒田礲藉人力糞壤要鋤理新歲不敢閑農享自茲始  
〔二月東風吹原野地凍亦已消早覺農事動荷鋤過  
相招遲遲朝日上炊煙出林梢土膏脈旣起良耜利若  
刀高低徧翻墾宿草不待燒幼婦頗能家井臼常自操  
散灰緣舊俗門逕環周遭所冀歲有成殷勤在今朝〕  
三月良農知土性肥瘠有不相同時至萬物生芽蘖由地

中秉耒向畎畝忽徧西與東舉家往于田勞瘁在爾農  
春雨及時降被野何濛濛乘茲各布種庶望西成功培  
根利秋實仰天望年豐但使陰陽和自然倉廩充〔四〕  
月孟夏土加潤苗生無近遠漫漫冒淺陂芄芃被長阪  
嘉穀雖已殖惡草亦滋蔓君子與小人竝處必爲患朝  
朝荷鋤往薶耨忘疲倦且隨鳥雀起歸與牛羊晚有婦  
念將飢過午可無飯一飽不易得念此獨長歎〔五月〕  
仲夏苦雨乾二麥先後熟南風吹隴畝惠氣散清淑是  
爲農夫慶所望實其腹酤酒醉比鄰語笑聲滿屋紛然  
收穫罷高廩起相屬有周成王業后稷播百穀皇天貽  
來牟長世自茲卜願言仍歲稔四海盡蒙福〔六月〕當



晝耘水田農夫亦良苦赤日背欲裂白汗灑如雨匍匐  
行水中泥淖及腰脊新苗抽利劍割膚何痛楚夫耘婦  
當饑奔走及亭午無時暫休息不得避炎暑誰憐萬民  
食粒粒非易取願隙知稼穡無逸傳自古 〔七月〕大火  
既西流涼風日淒厲古人重稼穡力田在匪懈郊行省  
農事禾黍何旆旆碾以他山石玉粒使人愛大祀須粢  
盛一一稽古制是爲五穀長異彼稊與稗炊之香且美  
可用享上帝豈惟足食人一飽有所待 〔八月〕白露下  
百草莖葉日紛委是時禾黍登充積徧都鄙在郊旣千  
庾入邑復萬軌人言田家樂此樂誰可比租賦以輸官  
所餘足儲峙不然風雪至凍餒及妻子優游茅簷下庶

可以卒歲太平元有象治世乃如此

九月大家饒米

麩何啻百室盈縱復人力多春磨常不停激水轉大輪  
磴碾亦易成古人有機智用之可厚生朝出連百車莫  
入還滿庭勾稽數多寡必假布算精小人好爭利晝夜  
心營營君子貴知足知足萬慮輕

十月孟冬農事畢

穀粟旣已藏彌望四野空藁秸亦在塲朝廷政方理庶  
事和陰陽所以頻歲登不憂旱與蝗置酒燕鄉里尊老  
列上行肴羞不厭多魚羔復烹羊縱飲窮日夕爲樂姝  
未央禱天祝聖人萬年長壽昌

十一月農家值豐年

樂事日熙熙黑黍可釀酒在牢羊豕肥東鄰有一女西  
鄰有一兒兒年十五六女大亦可笄財禮不求備多少

取隨宜冬前與冬後昏嫁利此時但願子孫多門戶可  
扶持女當力蠶桑男當力耘耔 [十二月] 一日不力作  
一日食不足慘淡歲云莫風雪入破屋老農氣力衰偃  
僂腰背曲索綯民事急晝夜互相續飯牛欲牛肥菱藁  
亦預蓄蹇驢雖劣弱挽車致百斛農家極勞苦歲豈恒  
稔熟能知稼穡艱天下自蒙福 [明高啓看刈禾] 農工  
亦云勞此日始告成往獲安可後相催及秋晴父子俱  
在田札札鎌有聲黃雲漸收盡曠望空郊平日入負擔  
歸謳歌道中行鳥雀亦羣喜下啄飛且鳴今年幸稍豐  
私廩各已盈如何有貧婦拾穗猶惻惻 [京師嘗吳種  
新杭粳如玉遠漕來中吳初嘗愛精鑿想出官田租我

本東臯民少年習耕鋤霜天萬穗熟恣啄從飢烏日暮  
刈獲歸妻孥共歡呼茅屋夜春急風雨江村孤晨炊滿  
家香薦以出網鱸如今幸蒙恩遨遊在南都門前半區  
田別來想已蕪長年盜寸廩補報一事無投匕忽歎息  
飽食慙農夫

七言古詩

**增**

唐張籍江村行南塘水深蘆筍齊下田種

稻不作畦耕場磷磷在水底短衣半染蘆中泥田頭刈  
莎結爲屋歸來繫牛還獨宿水淹手足盡爲瘡山童繞  
衣飛撲撲桑村樵黑蠶再眠小姑採桑不向田江南熱  
旱天氣毒雨中移秧顏色鮮一年耕種長苦辛田熟家  
家將賽神

宋陸游農家秋晚戲詠鞭地如鏡築我場

破礮玉粒輸官倉九月野空天欲霜甌中初喜新稷香  
舍邊蕭蕭落葉多野蠶出繭飛黃蛾寒蔬種罷醉且歌  
隻雞短紙賽園婆  
楊萬里插秧歌田夫拋秧田婦接  
小兒拔秧大兒插笠是兜鍪囊是甲雨從頭上濕到胛  
喚渠朝餐歇半霎低頭折腰只不荅秧根未牢蒔未匝  
照管鵝兒與雛鴨

五言律詩

御製觀苗無意到潭柘詠時景  
晝永薰風至清泉泱泱長芳  
年添景色遲日換流光舊竹隨隄發新花滿澗香觀苗不  
覺晚微雨點衣裳

原唐杜甫茅堂檢校收稻二首香稻三秋末平田百頃

間喜無多屋宇幸不礙雲山御袂侵寒氣嘗新破旅顏  
紅鮮終日有玉粒未吾慳 稻米炊能白秋葵煮復新

誰云滑易飽老藉軟俱勻種幸房州熟苗同伊闕春無  
勞映渠盞自有色如銀 甞往白帝復還東屯復作歸

田去猶殘獲稻功築塲憐穴蟻拾穗許村童落杵光輝  
白除芒子粒紅加餐可扶老倉庾慰飄蓬 宋陸游統

分稻晚歸出裹一簞飯歸收百把禾勤勞解堪忍餘暇  
更吟哦歲惡增吾困家貧賴汝多村醪莫辭醉羹芋學

岷峨 明石沆觀稻稻水千區映村烟幾處斜冷風低  
起樹輕浪細浮花鳥雀深深圃鳧鷖淺淺沙社歌聲不

絕於此見年華

七言律詩

御製入關見雨膏潤澤禾苗茂遂喜而有作  
甘雨時霖爲洗  
兵恰逢戰勝武功成軍容萬隊初旋凱婦子千村正盭耕  
天意要荒同職貢人歡閭井共昇平征途每憶民生事喜  
見桑麻愜此情

**增**唐唐彥謙西明寺威公盆池新稻爲笑江南種稻時  
露蟬鳴後雨霏霏蓮盆積潤分畦小藻井垂陰擢秀稀  
得地又生金粟界結根仍對水田支公尚有三吳思  
更使幽人憶釣磯  
宋唐庚端孺糴米龍川得稞孺數十斛以歸作詩調之  
剉拔孤舟入瘴烟歸來百斛瀉豐年炊香未數神江白釀滑偏宜佛跡泉飽去定知頻夢

與醉中何至便妨禪。憑君爲比長安米，看直公車贖幾  
千。〔楊萬里種秧〕田底泥中跡尚深，折花和葉插畦心。  
晚秧初撚金絨線，先種輸他綠玉鍼。雲壠霧疇俱水響，  
絲風毛雨政春深。莫聽布穀相煎急，且爲提壺強勸斟。  
〔朱子次秀野泛滄波館至赤石觀刈早稻韻〕綠雲黃  
半武夷鄉，碧水縈紆一帶長。聞道放船飛阜蓋，定知行  
酒載紅裳。權謳如賀豐年信，樂飲閒酬此日涼。禾黍誰  
言不陽艷，晚炊流詠有餘香。〔明顧清獲稻用分秧韻〕  
負郭園池帶宅田，老晴天氣太平年。穫來禾稻叢高廩，  
散出牛羊滿近川。饋啓甌山騰霧靄，蟻香醅甕起淪漣。  
斜陽一枕西牕夢，縱有丹青不與傳。



五言排律增宋歐陽修和劉原父從幸後苑觀稻呈講筵諸公禁籟皇居接香畦鏤檻邊分渠自靈沼種稻滿漈田六穀名居首三農政所先擢莖蒙德茂養實以時堅曉謁龍池罷行瞻鳳蓋翩粹容知喜色嘉瑞奏豐年衰病慙經學陪遊與俊賢安知帝力及但樂歲功全拜賜秋風裏分行黼座前自憐臺笠叟來綴侍臣篇

五言絕句增唐韓愈和虢州劉使君稻畦鄂布畦堪數枝分水莫尋魚肥知己秀鶴沒覺初深宋梅堯臣稻

畦淺淺碧水平青青稻苗長偏知楚客愛白鷺飛下上

七言絕句

御製題耕圖浸種暄和節候肇農功自此勤勞處處同早辨

東田種種種褰裳涉水浸筠籠

**耕**土膏初動正春晴野

老支筇早課耕辛苦田家惟穡事隴邊時聽叱牛聲

**耙**

耨每當盱食念民依南畝三時願不違已見深耕還易耨

綠蓑青笠雨霏霏

**耖**東阡西陌水潺湲扶耖泥塗未得

閒爲念饗殮由力作敢辭竭蹶向田間

**碌碡**老農力穡

慮偏周早夜扶犁未肯休更駕烏犍施碌碡好教春水滿

平疇

**布秧**農家布種避春寒甲圻初萌最可觀自昔虞

書傳播穀民間莫作等閒看

**初秧**一年農事在春深無

限田家望歲心最愛清和天氣好綠疇千頃露秧鍼

**淤**

蔭從來土沃藉農勤豐歉皆由用力分薙草灑灰滋地利

心期千畝稼如雲

**拔秧**青蔥刺水滿平川移植西疇更

勃然節序驚心芒種迫分秧須及夏初天  
插秧千畦水澤正瀾瀾競插新秧恐後時  
亞旅同心欣力作月明歸去莫嫌遲  
一耘豐苗翼翼出清波萸稗叢生可若何  
非種自應芟薙盡莫教根莠敗嘉禾  
二耘曾爲耘苗結隊行更憂宿草去還生  
隴間餽餼頻來往勞勩田家婦子情  
三耘穉穉盈畦日正長復勤樵藁下方塘  
堪憐曝背炎蒸下惟冀青疇發紫芒  
灌溉塍田六月水泉微引溜通渠迅若飛  
轉盡枯槁筋力瘁斜陽西下未言歸  
收刈滿目黃雲曉露晞腰鎌穫稻喜晴暉  
兒童處處收遺穗村舍家家荷擔歸  
登塲年穀豐穰萬寶成築塲納稼積如京  
迴思望杏瞻蒲日多少辛勤感倍生  
持穗南畝秋來慶阜

成瞿瞿未釋老農情霜天曉起呼鄰里遍聽村村打稻聲

春碓秋林茆屋晚風吹杵日相依近短籬比舍春聲如

和荅家家篝火夜深時〔籠〕設言嘉穀可登盤糠粃還憂

欲去難粒粒皆從辛苦得農家真作雨珠看〔簸揚〕作苦

三時用力深簸揚偏愛近風林須知白粲流匙滑費盡農

夫百種心〔躡〕經營阡陌苦胼胝艱食由來念阻饑且喜

稼成登石磴從茲鼓腹樂雍熙〔入倉〕倉箱頓滿各欣然

補葺牛牢雨雪天眇到蓋藏休暇日從前拮据已經年

祭神東疇舉趾祝年豐喜見盈寧百室同粒我烝民遺澤

遠吹陶擊鼓報難窮〔暢春園觀稻時七月十一日也〕七

月紫苾五里香近園遺種祝禎祥炎方塞北皆稱瑞稼穡

天工樂歲穰

**增**唐韋莊稻田綠波春浪滿前陂極目連雲肥稭肥更  
被鷺鷥千點雪破烟來入畫屏飛〔宋滕白觀稻稻穗  
登場穀滿車家家雞犬更桑麻漫栽木槿成籬落已得  
清陰又得花 週遭圩岸綠山城一眼圩田翠不分  
到秋苗初熟處翠茸錦上織黃雲 〔范成大插秧種密  
移疎綠毯平行間清淺穀紋生誰知細細青青草中有  
豐年擊壤聲 〔東門外觀刈熟潮到靈橋綠繞船海邊  
力穡屢豐年淡青山色深黃稻恰似胥門九月天 〔陸  
游秋晚新築塲如鏡面平家家歡喜賀秋成老來懶惰  
慙丁壯美睡中聞打稻聲 〔夜聞鄰家治稻二頃春蕪

廢不耕半生名宦竟何成歸來每羨鄰家樂月下風傳  
打稻聲 [稻飯買得烏犍遇歲穰此身永免屬官倉塘  
南塘北九千頃八月村村稻飯香 [劉詵秧老歌三月  
四月江南村村插秧無朝昏紅妝少婦荷鉢出白頭  
老人驅犢奔

詩散句 [漢茅山父老歌佳雨灌畦稻陸田亦復周

唐李邕負郭喜秔稻安時歌吉祥 [杜甫荆扉臨野碓

半濕搗香秔 雲帆轉遼海粳稻來東吳 [白居易稻

飯紅似花調沃新酪漿 [元稹年年十月暮珠稻欲垂

新 [李賀昌谷五月稻細青滿平水 [杜牧罷亞百頃

稻西風吹半黃 [宋蘇軾共看山下稻涼葉晚翻翻

郭祥正選種隨土宜播植穠與稔  
陸游獲稻黃雲卷

春稔玉粒新  
新蔬經雨綠晚稻得霜紅  
白稻雨中

熟黃鸚桑下鳴  
戴復古稻田秋後雀茅舍午時雞

張伯玉穠稔西成稻逍遙北海尊  
元李孝光日氣常

蒸稻天香喜釀花  
原唐杜甫東屯稻畦一百頃北有

澗水通青苗  
稻米流脂粟米白公私倉廩俱豐實

宋蘇軾翠浪舞翻紅穠稔白雲穿破碧玲瓏  
君家稻

田冠西蜀擣玉揚珠三萬斛  
增張耒裹飯送君吾豈

敢黃雲穠稔連東臯  
原毛滂百里飽看紅穠稔一杯

輕愧黑蜿蜒  
何扶良田廬廬無西東穠稔臥畦雲滿

叢  
十里稻香新綠野一聲歌斷舊青樓  
增陸游未

黃雲上  
改晉二稻

論蓴羹與羊酪新秔要勝太倉紅 冰魚可釣羹材足

霜稻方登羅價平 春雨乍晴霜吐葉秋風初冷稻吹

花 築陂處處移新稻乘屋家家補破茆 春種入甌

香炊玉壓酒鳴槽滴碎珠 萬里秋風菰菜老一川明

月稻花香 泥融無塊水初渾雨細有痕秧正綠 僧

惠洪想見龍城山下路一川秋色稻花風 元李孝光

梅月逢庚江雨歇稻花迎午水風涼 梁庾肩吾青花

出稻苗 原周庾信六月蟬鳴稻 增唐王維郎國稻

苗秀 杜甫秔稻共比屋 稻穫空雲水 嘗稻雪翻

匙 秔稻熟天風 李頎白甌貯香種 李嘉祐時雨

稻秔齊 柳宗元霜稻侵山平 韓愈刈稻擔肩頰



張籍野氣稻苗風 孟郊種稻耕白水 浙玉炊香粳

白居易綠科秧早稻 紅粒綠渾稻 鹿米麀牙稻

朱慶餘雨色稻苗深 許渾霜秔野碓春 方干香

粳倩水春 鄭谷開懷江稻熟 韋莊稻熟渚禽肥

田深黍稻低 錢珣晚晴貪穫稻 宋梅堯臣清風生

稻花 王安石黃焦下澤稻 范成大稻穗黃欲臥

陸游雲碓春秔白 園丁刈霜稻 露下稻花香 金

完顏璫禾短新村墅 元劉因脈脈稻分溝 方夔移

秧趁芒種 李孝光城裏鑑湖稻 原唐杜甫香稻啄

殘鸚鵡粒 增李嘉祐萬畦新稻傍山村 李賀荒畦

九月稻又芽 李郢小田微雨稻苗香 皮日休處處

路傍千頃稻 [殷璠] 千里稻花應秀色 [韋莊] 稻花香

澤水千畦 [南畝] 秋風白稻肥 [秋雨] 幾家紅稻熟

滿畦秋水稻苗平 [杜荀鶴] 稻苗平入水雲間 [宋梅

堯臣] 霜前稻熟春紅稈 [王安石] 畦稻新春滑欲流

稻畦藏水綠秧齊 [蘇軾] 烏程霜稻襲人香 [紅稻] 白

魚飽兒女 [黃庭堅] 禾春玉粒送官倉 [王炎] 稻如馬

尾覆溝塍 [范成大] 江頭一尺稻花雨 [陸游] 稻陂雨

細豐年候 [壓塍] 霜稻報豐年 [稻壠] 青秧漫漫平

雨足人畦千頃稻 [楊萬里] 早黃稻穗已長鬚 [元馬

祖常] 江田稻花露始零 [李孝光] 稻盡秋田孕更青

詞增 [宋曹文龍] 點絳脣 [霜落] 吳江萬畦香稻來場圃夜

村春處茅屋寒燈雨 玉粒長腰沉水溫  
溫注相留住 共抄雲子更聽歌聲駐

**別錄原**

田家五行雨水節燒乾鑊以糯稻爆之謂之孛

婁花占稻色自早禾至晚稻皆爆一握各以器列比並  
分數斷高下以番白多爲勝卜人口亦如之

**種稻甲**

子戊辰巳巳庚午辛未壬申癸酉甲戌丙子丁丑戊寅  
巳卯癸未甲申戊子巳丑庚寅辛卯甲午庚子辛丑壬  
寅甲辰丙午丁未戊申巳酉壬子癸丑庚申辛酉壬戌  
癸亥成收開日忌平閉丑日

**犁田**須犁耙三四遍青

草或糞穰灰土厚鋪於內禽爛打平方可撒種則肥而  
發旺

**浸種**

宜甲戌壬午壬辰成開日早稻清明節前

浸晚稻穀雨前後浸用稻草包裹一斗或二三斗投於  
池塘水內缸內亦可晝浸夜收不用長流水難得生芽  
若未出用草會之浸三四日微見白芽如鍼尖大取出  
於陰處陰乾密撒田內候八九日秧青放水浸之糯稻  
出芽較遲浸八九日如前微見白芽方可種撒時必晴  
明則苗易豎亦須看潮候二三日復撒稻草灰於上易  
生根 插秧庚午辛未癸酉丙子巳卯壬午癸未甲申  
甲午巳亥庚子癸卯甲辰丙午戊申巳酉巳未辛酉戌  
收開日芒種前後插之早稻宜上旬拔秧時輕手拔出  
就水洗根去泥約八九十根作一小束却於犁熟水田  
內插栽每四五根爲一叢約離六七寸插一叢脚不宜

頻那舒手只插六叢却那一遍再插六叢再那一遍逐  
漸插去務要整直〔揚稻〕稻初發時用揚耙于稞行中  
揚去稗草易耘搜鬆稻根則易旺〔耘稻〕揚稻後將灰  
糞或麻豆餅屑撒田內用水耘去草盡淨近秋放水將  
田泥塗光謂之煇稻待土裂車水浸灌之謂之還水穀  
成熟方可去水或遇天少雨急鋤一遍弗令開裂俟天  
興雲則澆肥糞待雨弗致缺水則稻發不遏〔水稻〕稻  
之名不一然非水則無以生種藝之法宜選上流出水  
便其性也種稻者蓄陂塘以瀦之置隄閘以止之種時  
先放水十日後曳碌礮十遍地既熟淨然後下種候苗  
生五六寸拔而秧之高七八寸則耘之耘畢放水煇之

欲秀復用水浸之苗既長茂復薅拔以去莨莠農家收  
穫尤當及時江南上雨下水收稻必用喬杆笕架乃不  
遺失 [旱稻]宜用下田齊民要術曰凡下田停水處燥  
則堅塔濕則汙泥難治而易荒墮而殺種春耕者殺  
種尤甚故宜五六月曠之以擬大麥如水澇不得種九  
月一轉至春種稻萬不失一凡種下田不問秋夏候水  
盡地白背時速耕耙耨頻翻令熟二月半種稻爲上時  
三月爲中時四月初及半爲下時漬種令開口耨耩掩  
種之卽再遍耨苗長三寸耙耨而鋤之鋤欲速每經一  
雨輒耙耨苗高尺許則冒雨薅之科大如瓠者五六月  
中霖雨時拔而栽之入七月不復任栽今閩中有占城

種卽黃秬也性耐旱高仰處皆宜種謂之早占其米粒大而且甘早種早熟六十日卽可穫爲旱稻佳種北方水源頗少惟陸地霑濕處種稻其耕鋤薅拔一如前法

**增**齊民要術治旱稻赤米令飯白法莫問冬夏常以熟湯浸米一食久然後以手揅之湯令瀉去卽以冷水淘沃揅去白乃止飯色潔白無異清流之米又晞赤稻一白米裏著蒿葉一把白鹽一把白晞之卽絕白

佩文齋廣羣芳譜卷第八



佩文齋廣羣芳譜卷第九

穀譜

黍

**原**

黍 汜勝之書云黍者暑也待暑而生暑後乃成也說文云黍可為酒從禾入水為意六書精蘊云禾下

從余象細粒散垂之形古 一稱二米注云此亦 今注云禾之黏者為黍 一稱和 爾雅云一稱秬 爾雅

黑黍俱中米異耳 有黃白黎三色米皆黃比粟微大

北人呼為黃米屬火南方之穀性溫益氣補中久食令

人多熱小兒忌食他如牛黍燕領馬革驢皮稻尾大黑

黍秀成赤黍皆黍之異名也 **增**廣志有濕屯黃黍有

田黍 樞云鶯鴿之名 齊民要術今俗有鶯 關一 黍半夏

黍 **博雅**黍穰調之稊 **原**苗穗與稷同宜肥地多收

續通志卷三 黍

刈後乘濕卽打則稭易脫遲則稭著粒上難脫

**彙考** **原** 詩王風彼黍離離 曹風芄芃黍苗陰兩膏之

**小雅** 我黍與與 **大雅** 誕降嘉種維秬維秠 恒之

秬秠是穫是畝 **周頌** 豐年多黍多稌 **增** 詩小序華

黍時和歲豐宜黍稷也 **禮記** 曲禮黍曰薶合 **疏** 黍曰

薶合者夫穀秫者曰黍秫旣輒而相合氣息又香故曰

薶合也 **原** 王制秋薦黍 **月令** 仲夏之月農乃登黍

天子乃以雛嘗黍羞以含桃先薦寢廟 **注** 必以黍者黍

火穀氣之主也 **增** 周禮天官羊宜黍 **疏** 羊宜黍者羊

味甘熱黍味苦溫甘苦相成故云羊宜黍 **左傳** 其藏

之也黑牡秬黍以享司寒 **國語** 黍而不黍不能蕃庶

**原**史記封禪書管仲說威公曰古之封禪部上之黍北里之禾所以爲盛

**增**

漢書律歷志度者分寸尺丈

引也所以度長短也本起黃鍾之長以子穀秬黍中者一黍之廣度之九十分黃鍾之長注師古曰子穀猶言穀子秬卽黑黍中者不大不小也言取黑黍穀子大小中者率爲分寸也

**原**

宋書符瑞志黃帝時南夷乘白

鹿來獻秬鬯

**增**

隋書隱逸傳李士謙字子約趙郡平

棘人也李氏宗黨豪盛每至春秋二社必高會極歡無不沉醉喧亂嘗集士謙所盛饌盈前而先爲設黍謂羣從曰孔子稱黍五穀之長荀卿亦云食先黍稷古人所尙容可違乎少長肅然不敢弛惰退而相謂曰旣見君

子方覺吾徒之不德也。唐書王績傳績有奴婢數人

種黍春秋釀酒養鳧雁蒔藥草自供。山海經廣都之

野后稷葬焉爰有膏黍膏稷。言味好滑如膏。驩頭

之國維宜芑芑穆楊是食。註音黑黍今字從禾。原家

語孔子侍坐於魯哀公設桃具黍公曰以黍雪桃也孔

子對曰夫黍五穀之長也祭先王以爲上盛果有六而

桃爲下祭先王不得入於廟丘聞之也君子以賤雪貴

不聞以貴雪賤今以五穀之長雪瓜蓏之下是侵上忽

下也。增列子鄒衍在燕有谷地美而寒不生五穀鄒

子吹律而溫氣至今傳名曰黍谷。原韓子吳起欲攻

秦小亭置一石赤黍於東門外令人能徙於西門外者

賜之上田宅人爭徙之乃下令曰明日攻秦能先登者與之大夫賜之上田宅於是攻之一朝而拔

**增**韓子

韓昭侯之時黍種嘗貴豈有昭侯令人覆廩廩吏果竊黍種而糶之

淮南子渭水多力而宜黍

焦氏易林

中田高黍以享王母受福千億所求大得

下田種黍

芳華當齒大雨林集紛榮滿壑

春秋佐助期黍神名

俯佞姓蘭郝

春秋說題辭精移火轉生黍夏出秋改

黍者縮也故其立字木入米爲黍酒以扶老

東觀漢

紀承宮字少子瑯琊人嘗將妻子入華蓋蒙陰山谷耕

種禾黍臨熟人就認之宮便推與而去由是發名

古

今注和帝元興元年黑黍穗一禾二實或三四實生任

城得粟二斛八斗以薦宗廟

博物志黑墳宜麥黍

紀年書惠成王八年雨黍

文中子藝黍登場歲不過

數石以供祭祀賓客之酒也

談藪王元景大醉楊遵

彥曰何大低昂元景曰黍熟頭低麥熟頭昂黍麥俱有

所以低昂

農桑通訣

秬鬯

一卣此言黍之爲酒尙矣

今有赤黍米黃而黏可蒸食白黍釀酒亞於糯秫又北

地遠處惟黍可生其莖穗低小可以釀酒又可作饌粥

黏滑而甘凡祭祀以爲上盛貴其色味之美也

**原**成

化元年天雨黑黍於襄陽

**集藻**

**賦**

**增**晉嵇含孤黍賦

余慎終屋之南榮有孤黍生

焉因泥之濕遭土之潤宿昔芽蘖滋茂其速塗燥根淺

忽然萎隕深感此黍不韜種以待時貪榮棄本寄身非  
所自取凋枯不亦宜乎

文賦散句原漢張協七命大梁之黍瓊山之禾唐稷播

其根農帝嘗其華增劉穎魯都賦禾黍油油杭族垂

芒殘穗滿握一穎盈箱魏王粲登樓賦華實蔽野禾

黍盈疇

四言古詩原晉束皙華黍騶騶重雲習習和風黍華陵

巔麥秀丘中靡田不播九穀斯豐奕奕玄霄濛濛甘

雷黍發稠華亦挺其秀靡田不植九穀斯茂無高不

播無下不植芒芒其稼參參其穡穡我王委克我民食

玉燭陽明顯猷翼翼

詩散句增唐李白東臯春事起種黍早歸田杜甫耕

田秋雨足禾黍已映道賴知禾黍收已覺糟床注

原耿滄古道無人行秋風動禾黍宋蘇軾今年秋應

熟過從飽雞黍金趙元還思釀新黍甕面挹秋江

唐曹鄴黑黍春來釀酒飲青禾刈了驅牛載增韋應

物禾黍積東菑宋邵雍黃黍秋正熟陸游種黍蹋

麴蘖唐白居易陶令有田唯種黍韋莊主人饋餉

炊紅黍宋王安石連山沒雲皆種黍陸游黍酒新

成壓小槽

別錄增齊民要術凡黍稷田新開荒爲上大豆底爲次

穀底爲下地必欲熟再轉乃佳若春夏耕一畝用子四

者下種後再勞爲良



升三月上旬種者爲上時四月上旬爲中時五月上旬

爲下時夏種黍稷與植穀同時非夏者大率以椹赤爲

候諺曰椹離離種黍時燥濕候黃塲種訖不曳撻常記十月十一

月十二月凍樹日種之萬不失一凍樹者疑霜封著木條也假令月三日凍

樹還以月三日種黍他皆做此十月凍樹宜早黍十一

月凍樹宜中黍十二月凍樹宜晚黍若從十月至正月

皆凍樹者早晚黍悉宜也苗生隴平即宜耙勞鋤三遍乃止鋒而不

耕苗晚耕即多折也刈稜欲早刈黍欲晚稜晚多零落黍早米不成皆即濕

踐之稜踐訖即蒸而裛之不蒸者難舂米碎蒸則易舂米堅香氣經夏不歇黍

宜曬之令燥濕聚則鬱凡黍黏者收薄稜味美者亦收薄難

春 雜陰陽書曰黍生於榆六十日秀秀後四十日成

黍生於巳壯於酉長於戌老於亥死於丑惡於丙午忌

於丑寅卯祭忌於未寅孝經援神契云黑墳宜黍麥書考靈曜云夏火星昏中可以種黍菽汜勝之書曰種黍必待暑先夏至二十日此時有雨疆土可種黍一畝三升黍心未生雨灌其心心傷無實黍心初生畏露令人對持長索槩去其露日出乃止凡種黍覆土鋤治皆如禾法欲疎於禾按疎黍雖科而米黃又多減及空令穰雖不科而米白且均熟不減更勝疎者汜氏云欲疎於禾其義未聞 崔氏曰四月蠶入簇時雨降可種黍禾夏至先後各二日可種黍蟲食李者黍貴也 **原**製用三月三日取黍麪和菜作羹能避時氣黍米性黏可釀酒可作餈可蒸煑爲糕麩五月五日俗以菰葉裹

成糲名角黍祭三閭大夫遺製也 合葵菜食成痼疾

合牛肉白酒食生寸白蟲 穰及根煮汁解苦瓠毒浴

去浮腫 醉臥黍穰令人生厲落斛髮

稷

**原**稷一名糲 六書故云稷糲同聲實一字也本草云稷

也南人承北音呼稷 從粿粿進力治糲也種稷者必粿粿進力

爲糲謂可供祭也 一名粢 爾雅云粢稷蔬 關西謂之

糜 音靡見唐本草 冀北謂之緊 音牽去聲廣雅云緊糲也 苗似蘆莖高三四

尺有毛結子成枝而疎散外有薄殼粒如粟而光滑色

紅黃米似粟米而稍大色黃鮮麥後先諸米熟炊飯疎

爽香美故以供祭食之益氣安中宜脾利胃涼血解暑  
壓丹石毒屬土脾之穀也脾病宜食多食發冷病

增

本草稷與黍一類二種也黏者爲黍不黏者爲稷稷可作飯黍可釀酒猶稻之有粳與糯也其色有赤白黃黑數種黑者禾稍高俗通呼爲黍子不復呼爲稷矣北邊地寒種之有補河西出者顆粒尤硬〔廣志〕稌有赤白黑青黃鶯鴿凡五種破滅稷逼麥稷此二者以四月熟

〔齊民要術〕按今俗有驢皮稌〔博雅〕稷穰謂之穠

**彙考原**詩王風彼稷之苗〔小雅〕我稷翼翼〔增〕禮記

曲禮稷曰明粢疏稷曰明粢者稷粟也明白也言此祭祀明白粢也〔月令〕孟秋之月農乃登穀〔註〕穀謂稷也

〔周禮〕天官豕宜稷疏豕宜稷者豕豬味酸牝豬味苦稷米味甘甘苦相成故曰豕宜稷〔隋書〕天文志稷五

星稷農正也取乎百穀之長以爲號也 穆天子傳天

子西征至于赤烏之人獻稷麥百載 天子北征入于

曹奴之人獻稷米百車 天子西征至于鷓韓氏爰有

樂野濫和稷麥之所草 天子東南翔行馳驅千里至

於巨蒐之人翦奴獻秋麥千車膜稷三十車 原呂氏

春秋飯之美者有陽山之稷 增風俗通米之神爲稷

故以癸未日祠稷於西南水勝火爲金相也 孝經說

稷者五穀之長五穀衆多不可徧祭故立稷而祭之

尚書考靈曜春鳥昏星中以種稷秋虛星昏中以收歛

百虎通稷者得陰陽中和之氣而用尤多故爲長也

獨斷稷神蓋厲山氏之子柱也柱能植百穀帝顓頊

之世舉以爲田正天下賴其功周棄亦播植百穀以稷  
五穀之長也因以稷名其神也〔齊民要術〕穀者總名  
非止爲粟也然今人專以稷爲穀俗名之耳〔爾雅翼〕  
稷者五穀之長以其中央之穀月令中央土食稷與牛  
五行土爲尊故五穀稷爲長〔兼明書〕或問曰稷旣百  
穀之神不言穀而云稷者何也荅曰稷屬土而爲諸穀  
之長故月令謂之首種首種者種最在前也諸穀不可  
徧舉故舉其長而爲言之以等之也若直以穀言則爲  
人所褻慢也

**別錄增**〔兩鈔摘腴〕毛詩傳注先集維霰曰霰稷雪也或  
謂之米雪謂其粒若稷米然〔本草衍義〕糝米其香可

愛故取以供祭祀然發故疾只堪作飯不黏其味淡

**原**稷三月種耘四遍七月熟四五月亦可種但收少遲耳刈稷欲早八九月熟便刈少遲遇風卽落 忌與瓠子附子同食

蜀黍

**原**蜀黍一名蜀秫

種自蜀來故以蜀爲名農政全書云其黏者近秫故借名爲秫

一名

蘆稌一名蘆粟一名高粱

形類黍稷而高大如蘆荻故有諸名

一名木稷

一名荻梁

廣雅云荻梁木稷也

種宜卑下地春月早種得子多秋

收莖麤高丈餘狀似蘆荻而內實葉亦似蘆穗大如帚粒大如椒紅黑色米性堅實黃赤色熟時先刈其穗稽成束攢而立之方得乾米有二種黏者可和糯秫釀酒

作餌不黏者可作糕煮粥可濟飢亦可養畜莖可織箔  
編席夾籬供爨梢可作笊帚殼浸水色紅可以紅酒有  
利於民者最博性溫溫溫中溫腸胃止泄瀉

**彙考** **增** 博物志三年種蜀黍其後七年多虵

**別錄** **增** 農政全書玄扈先生曰蜀秫在北方地不宜麥  
禾者乃種此尤宜下地立秋後五日雖水潦至一丈深  
不能壞之立秋前水至即壞故北土築堤二三尺以禦  
暴水

**附錄** 玉蜀黍 原作御麥附麥後按御麥乃  
別名實蜀黍類也今移入此

**原** 玉蜀黍一名玉高粱一名戎菽一名御麥 以其曾經  
進御故名

御麥出西番舊名番麥按農政全書又作玉米玄扈先  
生曰玉米或稱玉麥或稱玉蜀秫從他方得種其曰米



麥林皆借名之幹葉類蜀黍而肥矮亦似薏苡苗高三四尺六

七月開花成穗如秕麥狀苗心別出一苞如櫻魚形苞

上出鬚如紅絨垂垂久則苞拆子出顆顆攢簇子粒如

芡實大而瑩白花開於頂實結於節

粟

**原**粟

古作粟象穗在禾上之形說文云粟之為言續也續於穀也

梁屬也

蓋梁之細者本草云

穗大而毛長粒麤者為粟北方直名之曰穀脫殼則謂

穗小而毛短粒細者為粟

**增**

本草粟一名秬粟古以粟為黍稷梁秬之

總稱而今之粟在古但呼為梁後人乃專以梁之細者

名粟大抵黏者為秬不黏者為粟故呼此為秬粟以別

秬而配秬

**原**

稈高三四尺似蜀秬稈中空有節細而

矮葉似蘆小而有毛穗似蒲有毛顆粒成簇性鹹淡養  
 脾胃補虛損益丹田利小便解熱毒陳者尤良北人日  
 用不可缺者諺云穀三千一穗之實至三千顆言多也  
 其名或因姓氏地里或因形似時令早則有趕麥黃百  
 日糧六十日還倉之類中則有八月黃老軍頭之類晚  
 則有鴈頭青寒露粟鐵鞭頭之類又有梁穀滑穀白穀  
 白穀黃米黃穀白米之類 **增**廣志有赤粟白莖有黑  
 格雀粟有張公斑有含黃有蒼背稷有雪白粟亦名白  
 粟又有白藍下竹頭青白逸麥擢石精狗躡之各種云  
 齊民要術朱穀高居黃劉猪獬道愍黃聒穀黃雀懊  
 黃續命黃百日糧有起婦黃辱稻糧奴子場音加支穀

焦金黃鵠鳩合履今一名麥爭場此十四種早熟耐旱  
免蟲聒穀黃辱稻糧二種味美今墮車下馬看白羣羊  
懸蛇赤尾龍虎黃雀民溱馬洩韃劉豬赤李谷黃河摩  
糧東海黃石駢歲青莖青黑好黃陌南木隈隄黃宋黃  
癡指張黃兔肱青惠日黃寫風赤一睨黃山嵯頓黨黃  
此二十四種穗皆有毛耐風免雀暴寶珠黃俗得白張  
鄰黃白嵯穀鉤於黃張蟻白耿虎黃都奴赤茄蘆黃薰  
豬赤魏爽黃白莖青竹根黃調母梁磊礮黃劉沙白憎  
延黃赤梁穀靈忽黃獺尾青續得黃得容青孫延黃豬  
矢青烟熏黃樂婢青平壽黃鹿櫬白嵯折作黃禪穆阿  
居黃赤巴梁鹿蹄黃鉞狗倉可憐黃米谷鹿櫬青阿返

此三十八種中麤大穀白麤穀調母梁二種味美擇谷  
青阿居黃猪矢青有二種味惡黃稗稂樂婢青二種易  
舂石柳閱竹葉青一名胡谷水黑穀忽泥青衝天棒雉  
子青鴟脚穀雁頭青攬堆黃青子規此十種晚熟耐蟲  
災則盡矣

**彙考**

**原**

左傳襄公二十九年鄭子展卒子皮卽位於是

鄭饑而未及麥民病子皮以子展之命餼國人粟戶一

鍾

晉書孝友傳劉殷夢人曰西籬下有粟寤而掘之

果得粟十五鍾銘曰七年粟賜孝子劉殷

宋書符瑞

志文帝元嘉二十二年醴湖屯生瑞粟一莖九穗

**增**

宋史食貨志

初農時太宗嘗令取畿內青苗觀之聽政

之次出示近臣是歲畿內菽粟苗皆長數尺帝顧謂左右曰朕每念耕稼之勤苟非兵食所資固當盡復其租稅管子桓公觀於野曰何物可比君子之德隰朋曰粟可比君子之德管仲曰苗始出生也煦煦乎似孺子安之則安不得則危命之曰禾可比君子桓公曰善

**原** 韓非子鄒穆公有令食鳧雁者必以租無敢以粟鳧雁無食而以一石粟易一石租其費甚矣請以粟食之公曰非爾所知也夫百姓餉牛而耕曝背而耘勤而不敢惰者豈爲鳥獸食哉粟米人之上食也奈何以養鳥汝知小計而不知大害矣 淮南子昔者倉頡作書而天雨粟 **增** 風俗通燕太子丹仰天歎天爲雨粟 **焦**

氏易林新田宜粟上農得穀君子懷德以千百福 春

秋說題辭粟助陽扶性粟之為言續也粟五變一變而

以陽生為苗二變而秀為禾三變而祭然謂之粟四變

入曰米出甲五變而蒸飯可食陽以一立為法故粟積

大一分穗長一尺文以七列精以五六立故其字為粟

西者金所立米者陽精故西字合米而為粟 博物志

雁食粟則翼重不能飛 古今注武帝建元四年天雨

粟 宣帝地節三年長安雨黑粟 元帝竟寧元年山

都縣雨粟色青黑味苦大者如小豆小者如麻子 拾

遺記樂浪之東有背明之國宜種百穀有搖枝粟其枝

長而弱無風常搖食之益髓有鳳冠粟似鳳鳥之冠食

者多力有游龍粟葉屈曲似游龍也有瓊膏粟白如銀  
食此二粟令人骨輕 員嶠山一名環丘上有方湖周  
迴千里多大鵲高一丈銜不周之粟粟穗高三丈粒皎  
如玉鵲銜粟飛於中國故世俗間往往有之其粟食之  
歷月不饑故呂氏春秋云粟之美者有不周之粟焉  
述異記宋文帝卽位而江表二千餘里野粟生焉 **原**

唐紀宣宗大中二年福建進瑞粟十五莖莖五六穗

**增**全唐詩話李紳初以古風求知於呂溫溫見齊煦誦  
憫農詩曰春種一粒粟秋收萬顆子四海無閒田農夫  
猶餓死鋤禾日當午汗滴禾下土誰知盤中飧粒粒皆  
辛苦曰此人必爲卿相果如其言 泉州志紫帽山有

金粟洞宋李邴云唐時泉人客洛陽邂逅一羽衣寄書  
紫帽隱者既歸授書遺以粟米半升還家視之金粟也  
宋寧宗御書金粟之洞四字刻於石

**集藻**

七言律詩增宋朱子次秀野種粟韻阿香一笑走

豐隆雨徧平疇萬頃中舊喜樊遲知學圃今看許子快  
論功遙憐鬱鬱翻秋隴預想垂垂弄晚風珍重詩翁且  
強健東阡南陌興無窮

詩散句

增

唐李白雖有數斗玉不如一盤粟

韓愈困

倉穀粟滿未有旦夕憂

杜甫瘦地翻宜粟

方干春

粟引高泉

宋陸游雲嶼鋤畬粟

唐杜甫鳥雀苦肥

秋粟菽



梁

按梁與粟一類二種原譜於粟部內獨載青粱一種者非今從本草增入又按爾雅藟赤苗註

云今之赤粱藟苞白苗註云今之白粱藟藟同糜詩大雅維糜維苞傳用爾雅疏亦引郭註以

解之自蘇頌圖經本草列於黍部李時珍本草綱目因之而遂辨郭註為非誤矣

**增** 本草

粱者良也穀之良者也

即粟也

周禮九穀六穀之名有粱無粟

自漢以

後始以大而毛長者為粱細而毛短者為粟今則通呼

為粟而粱之名反隱矣今世俗稱粟中之大穗長芒麤

粒而有紅毛白毛黃毛之品者即粱也蘇恭曰黃粱蜀

漢商浙間穗大毛長穀米俱麤于白粱而收子白粱穗

少不耐水旱食之香美勝于諸粱人號竹根黃白粱大

多毛且長而穀麤扁長不似粟圓也青粱穀穗有毛而

米亦白而大食之香美亞于黃粱粒青米亦微

青而細于黃白粱粒似青稞而少麤早熟而收薄夏月食之極為清涼但味短色惡不如黃白粱北人少種之作餲清白勝于餘米

廣志有具粱解粱有遼東赤粱魏武帝常

以作粥

**彙考****增**禮記曲禮梁曰薺蕒疏梁曰薺蕒者梁謂白梁

黃梁也其語助也周禮天官犬宜梁疏犬宜梁者犬

味酸而溫梁米味甘而微寒氣味相成故云犬宜梁

**集藻**五言律詩**原**唐杜甫佐還山後寄一首白露黃梁

熟分張素有期已應春得細頗覺寄來遲味豈同金菊

香宜配綠葵老人他日愛正想滑流匙

詩散句**增**唐杜甫新炊間黃梁

**別錄****原**種穀地欲肥耕欲細欲深秋耕更佳種欲成實

不秣用臘雪水浸過耐旱辟蟲時欲仲春得雨為妙小

雨欲接濕大雨須俟少乾先耙後種種後旋以石砵砵

令土堅則苗出旺相如遇天旱苗出土仍硬春種欲深  
夏種欲淺早禾晚禾欲兼種防歲有所宜一云閏八月  
宜晚田然大率宜早早田收多於晚早田淨而易治晚  
者蕪穢難治且早穀米實而多晚穀皮厚米少而虛行  
欲稀諺云稀穀大穗來年好麥

〔鋤穀〕鋤以三遍四遍

爲度第一遍曰撮苗留苗欲密第二遍曰定科留其壯  
者去其密者弱者第三遍曰擁本鋤欲深擁其土以護  
根則耐旱第四遍曰復壟俗名添米五穀惟小鋤爲良  
苗出壟則深鋤鋤不厭數周而復始勿以無草而怠功  
鋤者非止去草蓋地熟而實多糠薄而米美鋤得十遍  
可得八米春鋤起地夏鋤除草春鋤不用觸濕六月以

後雖濕亦無嫌。刈穀食貨志云力耕數耘收穫如盜賊之至故熟速刈乾速積刈早則傷鎌刈晚則折穗遇風則收減濕積則藁爛積晚則粒耗連雨則生耳所以收穫不可緩也收穫者農事之終務本者可怠焉而自棄其前功乎。積穀周禮地官曰舍人掌粟入之藏註曰九穀俱藏以粟爲主神農之教曰有石城十仞湯池百步帶甲百萬而無粟弗能守也北方水土深厚窖地而藏可數十年不壞。

**秣**

按秣與粟同類異種原譜言粟而不及秣今從本草增入

**增**爾雅衆音終秣注謂黏粟也。疏與穀相似其莖桿似禾而麤大者是也。〔本草〕秣一名糯秣一名糯粟一名黃

糯

秫字篆文象其禾體柔弱之形俗呼糯粟北人呼爲黃糯亦曰黃米釀酒劣於糯也蘇恭曰凡

黍稷粟秫種糯三穀皆有秬糯也李時珍曰秫卽粟米

粟米之黏者有赤白黃三色皆可釀酒圖經謂秫爲黍

之黏者說文謂秫爲稷之黏者古今注謂秫爲稻之黏

者皆誤也惟蘇恭以粟秫分秬糯孫炎注爾雅謂秫爲

黏粟者得之廣志有胡秫早熟及麥齊民要術按

今世有黃粱穀秫桑根秫櫨天培秫也

**彙考**增晉書孔羣傳羣性嗜酒嘗與親友書云今年田

得七百石秫米不足了麴蘖事燕翼貽謀錄宋种放

有別墅在終南山聚徒講學性嗜酒種秫自釀林泉之

景頗爲幽勝真宗聞之欲幸其家而不果咸平六年遣

使畫圖以進 澄懷錄 种明逸嗜酒嘗種秫自釀曰空

山清寂聊以養和自號雲谿醉侯 聞奇錄 徐庭實巡

官說乾符中武義縣有人入山掘地二尺忽陷丈餘深

數尺收得秫百斛莫知其由將醱酒其味濃厚

詩散句 增 晉陶潛春秫作美酒酒熟吾自斟 宋陸游

供秫借留客 元方夔種秫田多早帶秋

附錄 穆子

**原** 穆子一名龍爪粟一名鴨爪稗 本草云穆乃不黏之稱亦不實之貌龍爪

鴨爪象其形也 北地荒坡處種之苗葉似穀至頂抽莖有三稜

開細花簇簇結穗如粟穗而分數岐如鷹爪之狀內有

細子如黍粒而細褐色味澀稈甚薄碾米煮粥炊飯磨

麩蒸食皆宜可救荒

附錄稗稗

**增**

爾雅蓊英

注蓊似稗布地生穢草疏似稗之穢草也

爾雅翼

稗與稗二物也皆有米而細小

本草稗乃

禾之卑賤者也故字從卑陳藏器曰有二種一黃白色一紫黑色紫黑者似芑有毛北人呼爲烏禾

**原**稗野

生苗葉似稗子色深綠根下葉帶紫色梢頭出扁穗結子如黍粒茶褐色味微苦用與稗子同食之益氣宜脾故曹植有芳菰精稗之稱苗根治金瘡及損傷血出不已搗敷卽止甚驗每一斗得米三升稗苗似稗而穗如粟有紫毛卽烏禾也可救荒又可殺蟲煮以沃地螻蛄

皆死

**彙考** **增** 孟子五穀者種之美者也苟爲不熟不如蕪稗

**莊子** 道在稊稗 **原** 淮南子離先稻熟而農夫薈之

不以小利傷大獲也 **注** 離與稻相似 **增** 江表傳吳五

鳳元年交趾稗草化爲稻 **三峽考** 峽內隙地沙土宜

黍稷菽麥獨不宜 稊稗耳又一種自滇中來者曰雲南

稗一曰雁爪稗以形似名亦播種畦植與五穀爭價東

南所無也

**集藻** **七言古詩** **增** 元方回種稗歎農田插秧秧綠時稻

中有稗農未知稻苗欲秀稗先出拔稗餉牛惟恐遲今

年湖西田沒水却向湖東糴稗子一斗稗子價幾何已



值去年三斗米天災使然廣勝真焉得世間無稗人

**別錄**

**增**

汜勝之書稗既堪水旱種無不熟之時又特滋

茂良田畝得二三十斛魏武使典農種之頃收二千斛  
斛得米三四斗釀酒甚美釀炊食不減粟米可備荒稗  
稗一畝則當稻稗二畝宜擇其粘長而粒大種之倘遇  
水旱便可多種亦救荒之一助

附錄  
稗

**增**爾雅稗童粱注稗莠類也疏今人謂之宿田翁或謂  
之守田也說文稗禾秀之穗生而不成者謂之董節

爾雅翼稗惡草與禾相雜

本草一名狼尾草

爾雅

狼尾註云似茅可以覆屋本草拾遺謂卽此物按爾雅  
已釋稗曰童粱果爲一物不當重出也姑存之以備考

本草

稗

藟草

七

陳藏器曰生澤地似茅作穗廣志云子可作黍食李時珍曰莖葉穗粒並如粟而穗色紫黃有毛荒年亦可采食

**彙考**

**增**

詩曹風芣芣彼下泉浸彼苞稂

小雅不稂不莠

韓詩外傳馬不過稂莠

附錄  
萑草

**增**

爾雅皇守田注

似燕麥子如雕胡米可食生廢田中

一名守氣

爾雅翼萑米可爲飯生水田中苗子似小

麥而小四月熟久食不饑爾雅所謂皇守田也

附錄  
蒯草

**增**

爾雅翼蒯草子堪食如秔米

附錄 東廡

**增** **廣志** 東廡色青黑粒如葵子似蓬草色青黑十一月熟出幽涼并烏丸地 **魏書** 烏丸地宜東廡似稌可作白酒 **本草** 東廡生河西河西人語云貸我東廡償爾田梁

附錄 梁禾

**增** **本草** 李時珍曰 **廣志** 云梁禾蔓生其子如葵子其米粉白如麩可作餠粥六月種九月收牛食之尤肥此亦一穀似東廡者也

附錄 蒔草

**增** **本草** 蒔草一名自然穀一名禹餘糧言禹治水棄其

餘糧化而爲此詳見後博物志寇珣曰篩實如毬子八月收之海上民常食中國未常見也李時珍曰方孝孺有海米行亦篩草之類也

**彙考**

**增**

博物志扶海洲上有草名曰篩其實如大麥從

七月熟民歛穫至冬乃訖名曰自然穀或曰禹餘糧

**集藻**

七言古詩

**增**

明方孝孺海米行海邊有草名海米

大非蓬蒿小非薺婦女攜籃晝作羣采摘聊於海中洗歸來滌釜燒松枝煮米爲飯克朝饑莫辭苦澁咽不下性命聊假須臾時

**附錄**  
感禾

**增**齊民要術感禾扶疎生實似大麥

附錄楊禾

**增**齊民要術楊禾似藿粒細左折右炊停則牙生

附錄火禾

**增**齊民要術火禾高丈餘子如小豆出粟特國

附錄木禾

**增**山海經崑崙墟上有木禾長五尋大五圍

**彙考****增**穆天子傳天子東征至於重鰲氏黑水之阿爰

有野麥爰有荅草西膜之所謂木禾重鰲氏之所食

嘉禾

按詩注黍稷稻粱皆名爲禾麻與菽麥則無禾稱傳稱嘉禾皆統言之故另列於諸穀之後

**原**瑞應圖嘉禾五穀之長盛德之精也文者異本而同

續通志

卷三

楊禾 火禾 木禾 嘉禾

七

廣雅文選 卷之三 嘉言三  
秀質者同本而異秀此夏殷時嘉禾也

晉徵祥說王

者盛德則嘉禾生嘉禾者仁卉也其大盈箱一稔二米

**增**孝經援神契德下至地則嘉禾生

春秋運斗樞

璇星明則嘉禾液

春秋感應符日下淪於地則嘉禾

興春秋說題辭天文以七列星以五故嘉禾之滋莖

長五尺五七三十五神盛故連莖三十五穗以成盛德

禾之極也

**彙考原**書大傳成王時有苗異莖而生同爲一穗人有

上之者王召周公而問之公曰三苗爲一穗抑天下其

合爲一乎**增**史記魯周公世家唐叔得禾異畝同穎

獻之成王成王命唐叔以餽周公於東土作餽禾周公

既受命禾嘉天子命作嘉禾 〔前漢書宣帝紀神爵元

年詔曰嘉穀玄稷降於郡國 〔郊祀志〕王莽使中郎平

憲誘羗還云天下太平一禾長丈餘故乞內屬 〔後漢

書鄭玄傳〕玄年十六號神童民有獻嘉禾者欲表府文

辭鄙略玄爲改作又著頌一篇侯相高其才而修冠禮

焉 〔南蠻傳〕順桓之世板楯數反太守蜀郡趙溫恩信

降服於是宕渠出九穗之禾 〔吳志孫權傳〕黃龍三年

由拳野稻自生改爲禾興縣 〔南始平言〕嘉禾生改明

年嘉禾元年 赤烏七年秋宛陵言嘉禾生 〔宋書符

瑞志〕

漢安帝延光二年六月嘉禾生九真百十六本七百六十八穗 宋文帝元嘉十一年八月嘉禾一莖九

嘉禾

穗生北汝陰 二十二年六月嘉禾生藉田一莖九穗

嘉禾生華林園百六十穗 二十四年七月嘉禾旅

生華林園及景陽山江夏王義恭獻嘉禾甘露頌中領

軍吉陽縣侯沈演之上嘉禾頌 二十五年六月嘉禾

生華林園十株七百穗 孝武帝大明元年五月嘉禾

一株五莖生清暑殿鴟尾中 嘉禾生青州異根同穗

〔南齊書祥瑞志〕永明元年正月新蔡郡獲嘉禾一莖

五穗 八月新蔡縣獲嘉禾二莖九穗 一莖七穗 二

年八月梁郡睢陽縣界野田中獲嘉禾一莖二十三穗

〔魏書許謙傳〕謙子洛陽爲雁門太守家田三生嘉禾

皆異壠合穎太祖善之進爵北地公加鎮南將軍 〔隋



書循吏傳梁彥光爲岐州刺史甚有惠政嘉禾連理出於州境開皇二年上幸岐州悅其能賜粟五百斛物三百段御傘一枚南史梁宗室傳始興忠武王憺子暎

爲吳興太守郡累不稔中大通三年野穀生武康凡二十二處自此豐穰暎製嘉穀頌以聞舊唐書五行志

元和七年十一月龍州武安川會田中嘉禾生有麟食之復生麟之來一鹿引之羣鹿隨之光華不可正視使

畫工圖麟及嘉禾來獻新唐書代宗本紀乾元元年四月立爲皇太子初太子生之歲豫州獻嘉禾於是以

爲祥乃更名豫宋史理宗本紀景定元年建陽縣嘉禾生一本十五穗詔改建陽爲嘉禾縣遼史道宗本

紀太康三年九月玉田貢嘉禾

金史世宗本紀太定

二十四年正月辛卯真定進嘉禾二本六莖異畝同穎

五行志宣宗興定元年七月癸卯大社壇產嘉禾一

莖十五穗

十月丹州進嘉禾異畝同穎

熙宗皇統

四年正月乙丑陝西進嘉禾十二莖一本七穎

山海

經崑崙墟有禾末長五尋

穆天子傳

口山是唯天下

之良山也寶玉之所在嘉穀生之草木碩美天子於是

取嘉禾以歸樹於中國

瑞應圖

舜時后稷播植天降

秬秠故詩曰天降嘉種惟秬惟秠

東觀漢記光武以

建平元年生於濟陽縣是歲有嘉禾生一莖九穗大於

凡禾縣界大熟因名上曰秀

**原**

古今注漢魯恭拜中

牟令嘉禾生恭庭中

**增**會稽典錄謝承遷吳郡督郵

歲穰嘉禾六穗生於部屬

拾遺記炎帝始教民耒耜

躬勤畎畝之事時有丹雀銜九穗禾其墜地者帝乃拾

之以植於田食者老而不死周成王五年有因祇之

國丈夫勤於耕稼一日鋤十頃之地貢嘉禾一莖盈車

故時俗四言詩曰力勤十頃能致嘉穎燕昭王時有

白鷺孤翔銜千莖穠穠於空中自生花實落地則生根

葉一歲百穫一莖滿車故曰盈車嘉穠崑崙山者西

方曰須彌山上有九層第三層有禾穠一株滿車續

搜神記廬陵巴丘人文晁者世以田作爲業秋收已過

獲刈都畢明旦至田禾復湛然如先即便穫所獲盈倉

而巨富 **大業拾遺錄**七年九月太原郡有獻禾一本

三穗長八尺穗長三尺五寸大尺圍芒穗皆紫色鮮明  
自禾以上三尺餘亦紫色有老人年八十餘以素木匣  
盛之賜物三十段 **西域記**天竺國禾之長者沒橐駝

**酉陽雜俎**婚禮納采有合驪嘉禾嘉禾分福也

**原**

**唐紀**代宗永泰元年秋京兆府上言鄆縣嘉禾生穗長  
一尺餘穗上粒重疊如連珠 郭子儀上言寧朔縣界

荒地十五里有黑禾偶生徧地掃盡經宿復生其禾圓

實味甘美

**增**

**湧幢小品**

正德六年如臯縣嘉禾一本

有至百莖者其一本二十莖者尤多

**原**

**平陽縣志**萬

曆辛卯縣民有田六畝同時插秧中三畝勃然奮發五

日卽結穀收成縣以爲嘉穀先登豐年大瑞 **增**揭陽縣志嘉靖十年龍溪士人莊守德田稻一莖五穗以爲嘉禾獻於府知府丘其仁藏諸庫

**集藻**

**表增**

唐張說爲留守奏嘉禾表臣聞天聽自人神

和在德代非乏瑞罕遇開泰之期福不虛徵必俟休明之主伏惟皇帝陛下仁覆萬靈孝理四海政每先於帝籍役不紊於農時嘉氣橫游祥風紛灑騰文煒色九光連合於貞明逸輩殊倫百寶駢滋於動植臣今日日奉進旨告望鳳臺慶山醴泉之瑞其日於山陵東栢城內得嘉禾一本臣初見衆苗亘壟香穎垂秋嘉玩繁滋欲觀成粒左右無識折以呈臣異其綠葉綬舒葱芒璧秀

熟視奇狀乃知嘉祥下則異畝合莖上又同連雙穗昔  
雍熙之代政理之君雖導出應時而生不擇地未有託  
根神域彰孝德之能深吐秀壽宮助粢盛之豐潔此蓋  
睿誠通感靈祐降祥中古以來未覩斯美臣籍慶宗枝  
久沐星潢之潤躬持瑞穎預奉天保之符忭悅之誠倍  
兼恒品符載廬州進嘉禾表臣某言得廬州刺史裴  
靖狀稱巢縣百姓唐海母喪廬墓手自耕植以備祠祭  
無何於粟田之中輒產嘉禾一本六穗一本五穗卽時  
差錄事叅軍朱寧丁寧考驗事狀明白臣聞感天地者  
存乎誠通神明者極乎孝蘊而爲精粹發而爲禎祥上  
玄與之獻酬后土爲之泄露故使騰芳高隴擢穎清秋

冠九穀之英英增大田之藹藹此皆陛下聖德茂鴻化  
洽名教生人之內有淳孝靈瑞之下有嘉禾邁風烈於  
前王煥丹青於唐史不然何幽贊玄答其若是乎臣猥  
以鈍劣祇守風土宜陛下之恩澤撫陛下之庶眚覩茲  
盛美光榮耳目不勝歡忭踊躍之至 權德輿嘉禾合  
穗表伏見武俊所奏恒州鼓城縣生嘉禾一本合穗又  
盧徵奏華州鄭縣獲嘉禾一穗者謹按孫氏瑞應圖曰  
嘉禾者五穀之長王者德茂則生伏惟陛下德叶玄功  
仁育生類同穎擢秀殊祥並時昔周道旣昌唐叔以獻  
表天下和平之兆爲陰陽訢合之符五穀登成百嘉備  
祉發於厚載集是休徵况嶽鎮之方表章繼至感通昭

晰莫甚於斯臣等忝列台司喜倍恒品 柳宗元賀嘉  
禾表今月某日宰臣以幽州所進嘉禾圖各一軸示百  
寮者伏以嘉穀順成靈貺昭格天人合應遐邇同心伏  
惟皇帝陛下睿謀廣運神化旁行植物知仁祥圖應聖  
靈嶽不愆於贊佑燕谷用遂於生成豐稔隨均知朔南  
之被澤休嘉克叶見天地之同和六穗慚稱於漢臣異  
畝恥書於周典自中形外均慶同歡臣謬職憲司獲觀  
嘉瑞無任抃躍之至 禮部賀嘉禾及芝草表伏見今  
月某日內出劔南所進嘉禾圖及陝州所進紫芝草示  
百寮者珍圖煥開瑞彩交映遐邇偕至福應攸同伏惟  
皇帝陛下緝熙至道保合太和天惟發祥地不愛寶嘉



禾擢質靈草抽英獻于王庭唐叔慚同穎之異薦諸郊  
廟班史謝連葉之奇旣呈疑疑之祥更覩煌煌之秀豐  
年斯著聖壽用彰飲和之人歡忭無極臣等優游至化  
披翫殊姿慶忭之誠倍百恒品 張仲素賀嘉禾表伏  
見鄆州東平縣官莊地內有禾異壠雙本合成一穗畫  
圖奏進傳示百寮者謹按瑞應圖曰王者德茂而太平  
君臣和則嘉禾朱草以甲萌言不得中和之氣卽不生  
也伏惟陛下鼓和風茂休應泰階平於上下大中建於  
人臣神明是若徵見必報通彼殊壠總其雙莖滋大澤  
以冥造成嘉穗而薦和合爲一彰至化之會同堅而好  
表資生之豐實推物類以得天意觀繪事而擬靈篇凡

在班行咸同慶幸

狀增唐韓愈奏汴州得嘉禾嘉瓜狀謹按符瑞圖王者德至於地則嘉禾生伏惟皇帝陛下道合天地恩霑動植邇無不協遠無不賓神人以和風雨咸若前件嘉禾等或兩根並植一穗連房或延蔓敷榮異實共蒂旣叶和同之慶又標豐稔之祥感自皇恩微莖何極於造化親逢嘉瑞小臣喜遇於休明

謳增魏曹植穀謳於穆聖皇仁暢惠渥辭獻減膳以服鰥獨和氣致祥時雨灑沃野草萌芽變化嘉穀猗猗嘉禾惟穀之精其洪盈箱協穗殊莖昔生周朝今植魏廷獻之廟堂以昭祖靈

**頌增**

宋劉義恭嘉禾頌并表臣聞居高聽卑上帝之功

天且弗違聖王之德故能影響二儀甄陶萬有鑒觀今古採驗圖緯未有道闕化虧而禎物著明者也自皇運受終辰曜交和是以卉木表靈山淵効寶伏惟陛下體乾統極休符襲逮若乃鳳儀西郊龍見東邑海酋獻改緇之羽河祗開俟清之源三代象德不能過也有幽必闡無遠弗屆重譯歲至休瑞日臻前者躬籍南畝嘉穀乃植神明之應在斯尤盛四海既穆五民樂業思述汾陽經始靈囿蘭林甫樹嘉露頻流板築初就祥穰如積太平之符於是乎在臣以寡立承乏槐鉉浴沐芳津預睹冥慶不勝忭舞之情謹上嘉禾甘露頌一篇不足稱

揚美烈追用悚汗頌曰二象攸分三靈樂主齊應合  
在今猶古天道誰親惟仁斯輔皇功帝績理冠區宇四  
民均極我后體茲惟機惟神敬昭文思九族既睦萬邦  
允釐德以位叙道致雍熙於穆不已顯允東儲生知夙  
嶽嶽茂淵虛因心則哲令問弘敷繼嶽下武儷景辰居  
軒制合宮漢興未央矧伊聖朝九有已康率由舊典思  
燭前王乃造陵霄遂作景陽有藹景陽天淵之涘清暑  
爽立雲堂特起植類斯育動類斯止極望江波遍對嶽  
峙化德惟達休瑞惟懋誕降嘉種呈祚初構甘露春凝  
禎穉秋秀於今匪烈嗣歲仍富昔在放勳曆莢數朝降  
及重華倚扇清庖鑠矣皇慶比物競昭倫彼典策被此

風謠資臣六蔽任兼兩司旣恧仲袞又慙鄭緇豈忘衡  
泌樂道明時敢述休祉愧闕令辭 〔沈演之嘉禾頌煥

炳禎圖昭晰瑞典運傾方闕時亨始顯綵狀旣章鳥文  
斯辯於皇聖辟承物紀遠明兩辰麗昌輝天衍 理妙  
位崇事神業盛淵渥德澤虛寂道政協化安心調樂移  
性玉衡從體瑤光得正臣星垂采景雲立慶 極仁所  
被罔幽不攘至和所感靡況弗彰駕出丹穴鸚起西廂  
白鹿踰海素鳥越江結響穹陰儀形鐘陽 治人奉天  
迺勤迺格黛耜俶載高廩已積嘉禾重穆甘露流液擢  
秀辰畦揚穎角澤離稊合豪榮區蔭斥 盈箱徵殷貫  
桑表周今我歲末靈貺綢繆帝終摛謙繹思勿休躬薦

宗廟溫恭率由降福以誠孝享虔羞 頌社推功登徽  
獻詔恩覃隱顯賞延荒徼河濂海夷山華嶽耀憬琛負  
費兼澤委效日表地外改服請教 茂對盛時綏萬屢  
豐厭厭歸素秩秩大同上藏諸用下知所從仰式王度  
俯歌南風鴻名稱首永保無窮

**贊****增**漢鄭玄婚禮謁文贊嘉禾爲穀班祿是宜吐秀五  
七乃名爲嘉

**賦****增**唐潘炎嘉禾合穗賦并序景龍二年秋八月屬縣  
長子有嘉禾合穗瑞不虛月侯其偉而乃賦曰天祚明  
德兮降之嘉生案彼靈篇兮莫之與京脉震土膏且分  
苗於南畝駟臨天漢爰合穗以西成當元后之歷試表

休徵於太平不莠不稂實堅實阜引薰風於和氣承湛  
露於蒼昊生非百里驗管仲之虛辭出異崑山自我皇  
之所寶在瑞圖之右爲曠代之祥唐叔得之而合穎周  
成得之以克箱雙米一稔稱之表異孤莖六穗頌以非  
常今也尤盛居然允臧轉風而屢騰佳氣就日而交見  
祥光獨天不生託厚載於富媪非聖不感効元符於我  
皇我皇得之熾而昌風之起兮雲之揚嘉禾之瑞未可  
量天子億載臨萬方 張真祥嘉禾合穎賦南山之下  
兮無人之境力穡此中兮均夫躁靜勞則不憚旣寒耕  
而熱耘慶有所歸忽異畝而同穎莖駢惜芄芃之色秀  
合垂萑萑之影此焉觀瑞亦祇以異比於木乃連理之

祥在於人蓋同心之義稭已聞於二米莖乃殊於九穗  
豈非德之能及實聖朝之所致爰考休徵豐年是憑麥  
兩岐而能匹茅三脊而徒稱固神倉之可貯期郊廟之  
以升欲薦堯階且聞程程之獲將登神膳遂入焯焯之  
烝天道玄默瑞以表德豈無沃土而光於我家豈無異  
方而祚此王國不有嘉生孰謂賓榮友朋之心因取興  
於連茹兄弟之樂遂作戒於分荆佇聞唐叔之獻頌我  
后之升平 趙蕃句人獻嘉禾賦 聖上崇國本致時康  
動玄象之昭鑒產嘉禾而應祥甸人於是具畚鍤修封  
疆啟芳穎於修畛薦靈姿於我皇懿夫挺拔自分連拳  
相接始穰穰而齊實終矯矯而異葉殊其本均二氣以



發生同乎心表一德之和協不然者寧擢秀於墳衍載  
具美於圖牒徵其瑞質稽彼大同見芬敷而共貫信縈  
結以交通則知合乎帝道發自天功合穗之珍方將效  
祉於今日異畝之美豈獨標奇於古風於是野老歡心  
田夫盡力宛移根於沃壤之際俄發耀於丹墀之側祥  
烟近拂乍疑連理之形喜氣傍臨更辨合歡之色彌彰  
執契之道載助惟馨之德爾其天鑒非遠神珍是呈始  
茗亭而間出終天矯而曲成豈比躬稼之時盡化晉君  
之草挺生之歲克符漢帝之名向令質委離披孤生茇  
萑安得臨玉砌邇龍袞設種稂之萌芽爲理化之根本  
是知六府惟序萬邦式孚茅三脊而非偶獸共觝而自

殊未若耀青芳於近甸垂嘉貺於靈圖况復聖慮彌深  
皇猷思永梯山航海未足契其休光菲食卑宮將欲示  
其豐省斯所謂騰茂實於厚地故薦穗於重穎 明沈  
鯉嘉禾賦惟帝籍之千畝接宸極之宮墻翕垓埏之瑞  
煒穆元辰於孟陽萃坤靈而厚載孕扶輿以發祥錯龍  
鱗於原隰布鏤刻於滕疆沁玉河之沃潤滉金露之膏  
瀼拓周臺之靈囿陋漢苑之朱堂感華胥於禁寓闢融  
澤於扶桑禱農祥於地后震痺憤於天房蓋聖朝之所  
以先稼穡備蒸嘗展一人之孝思而闢社稷之靈長者  
也粵惟我皇踐祚闡坤握乾仁亶義濊聖思廣淵契七  
月之精蘊領無逸之真詮振天明而育德躬豐服於明

禋履桑林而簡器望三素以祈年當東作之平秩舉大典於籍田親秉耒以三推御葱轄於青壇命后稷以播穀簡伯禹以疏泉班保介而終畝勞百辟於肆筵布陽和於九有暢聖澤於八埏爾乃精忱上達協氣旁通瑞祉迸臻靈貺雲從沴氛神禦寶露時融宜暑宜寒十雨五風將及我私先急我公我黍翼翼我稷芃芃旣庭且碩實大以豐乃有嘉禾秀擢蒙茸或一本而多岐或數穗而同莖引瑤風以幻質濯玉漉而凝精陸離離以綴蕾睽采采以含英溶丹樾之芳潔燦瓊蘂之晶熒秉五七之恒德挺九穗之奇禎纍連珠而合穎壹金玉而本生霈休符於甘雨銜滋液於璇星毓祥柯以五變耀泰

運於九莖天施雨而匪瑞日淪地而有徵譬禮義之多  
富獵龍鳳之異名軼幽谷之蘭蕙掩玄圃之松苓彼紫  
麻綠苴豈嘉禾之與埒而碧麥靈苗詎並蔚而爭榮若  
夫粟雨炎帝瑞發軒轅陶虞異穡魯史書年成周合穗  
唐叔命篇字成雨於蒼頡穎頌著於鄭玄拳野產之而  
名邑赤烏因之以改元外此而朱萇曆於堯陞紫蕙苗  
於太原秀騰濟陰之境旅生建武之年稻孫揚蕤於金  
斗祥麟集食於武川敬仲乃啟封禪之所致汾陽極稱  
天瑞之可傳此皆帝不貴乎金玉而寶夫衣食之源故  
其政必調於函夏而時省歛於秋田之所致也乃有連  
叢合隴七穗五岐三苗四熟珍綺紛披或北里之稱盛

或玄山之讓奇不周或呈其異種帝庭或獻自外夷或  
光照九阿之謠或香聞五里之滋是以繁瓌侈稱於前  
代而昌符踵應於來茲孰若聖世之休禎炳靈淑於神  
祇實皇衷之淵塞特示象於疇菑既登八極於安和仍  
躋萬國於咸熙允阜澤之潛通羗弘化之寵綏於是田  
畷至喜穡夫載忻僉曰異哉世所希聞薄言采之以獻  
吾君於惟皇上勲華淑軌方且秉冲自下遜美弗居謂  
嘉穀之呈象豈涼德之克符實先聖之顯烈膺上帝之  
瑤圖也於是降明詔蠲吉辰徵太師之九奏舉宗伯之  
十倫飭豆登而並薦毳尊俎以俱陳信曾孫之有道企  
皇祖之居歆於是大禮告成億兆歡忻東漸海隅西暨

沙孺具瞻上瑞雷動風傳凡在廷之臣工咸稽首以屬  
言謂聖王治天下以孝而五穀爲王政之先茲者聖德  
廣運格於重玄一人有慶兆民賴焉將使至治刑於萬  
國嘉祥載於普天皇風皞皞王道平平端冕之旒四海  
晏然明明天子壽考萬年許國嘉禾賦勾吳文學躡  
屨之燕會天子藻潤太平四方瑞應日奏闕下旣聞有  
獻嘉禾者羣公畢賀迺盱衡濯慮而往觀之遣徇華子  
與好古先生辨論金門之左揖而聽其語徇華子曰吾  
聞太和之氣醞釀堪輿蓄極而發奇珍乃攄祥風之所  
披拂膏露之所沾濡神不能鬪其粹天不能表其符物  
涵逢涌溢爲嘉禾蓋冥搜於玉筴茲快覩於皇都夫其

陸海廣輪神膏沃衍龍首通渠魚鱗疊腕蔚封畛兮縱  
橫倬阡陌兮宛轉三推旣倡兮九扈作勞黃茂聿滋兮  
立功斯顯則有玉山異種北里仙英濟陽九穗崑崙五  
尋挹光華於日月凝沆瀣於太清卿雲照爛以垂覆景  
星煒燁而流晶毓非常之元化挺秀質於金莖爾乃穎  
擢丹霞顙抱明月豐枝苾葍璋幹芳潔或珠聯於異畝  
或琪映於同暉或兩儀分於混沌或五氣散於轆轤或  
參乎乾畫之精或象乎洛疇之列其生也后稷降靈厲  
山遺烈種美璧於藍田萃商金於清樾其用也含哺萬  
國芬芳九闔頤天顏於五位肇王基於七月倚寰中之  
上瑞羗閱世而昭揭昔蒼姬之受命兮爰抽祕於唐叔

逮白水之真人兮值虹流而載育曰悠悠其歷劫兮嗟  
未間乎芳躅匪至寶之不可恒兮何寂寥於圖籙聖皇  
建極兮超赫胥而軼大庭黃輿獻琛兮嘉禾乃登邇歲  
蕤兮千畝遠璀璨兮八紘由顧命越於今茲兮果何方  
兮弗獲亦何歲兮弗生保介紛綸而奏御奇祥雜選於  
汗青蓋千萬年之希睹而鴻濛剖判所未有之麻禎也  
謂宜陟岱嶽告成功勒蒼崖樹穹窿跨葦莢於堯除掩  
蟠桃於漢宮何爲乎僅升太廟之几聊陳尙膳之饗茂  
洪朗而弗耀抑崇峻以謙冲意者聖人之盛德兮慮非  
所以章明賜而承昊穹於是好古先生拂然色厲正襟  
諤諤而復之曰異乎子言所謂見一斑之文豹蔽豐蔀



而測星躔者也吾聞之柔桑暮拱殷道以興芝房協律  
漢業幾傾蒼麟駟於羯乘黃龍炫於吳京謂變者未必  
爲咎疑祥者未必爲禎其休其否此焉足憑嗟大鈞之  
寥闊兮二五交蒸神奇臭腐兮靡詭弗呈勘一抹一擠  
之榮亦造化之偶然兮夫何與於朝廷是故明王馭世  
不貴異物有兢兢而思慎曷顛顛於黼黻稽六府之重  
輕察三才之秒忽故以豐年爲寶民食爲天游神稼穡  
雅意甫田躬黛耜御紺轅厘穆清之宵盱祇求裕乎元  
元如其耕耘不擾疆理盡力多黍多稌時萬時億百室  
開兮婦子寧百禮洽兮神人懌卽大化之神明知協氣  
之融液雖無嘉禾奚損至德如其疆理蕪溝遂廢鳴條

不時濯枝愆序田畷失其吝茹亞旅闕其樹藝黔黎艱食風教剝敝雖有嘉禾奚益世故今天子遠覽陶鈞之上庶幾歸禾之旨視厥方貢讓而弗處有事寢園薦馨而已蓋俯徇乎百辟非則倣乎夸詡子大夫不究本原矜奇說異殊謬乎春秋之義語未卒勾吳文學攝齊而進曰長卿有言楚旣失矣齊亦未爲得也且皇天樹后以長世豈漠然其無情有錫羨以純佑或降威以宣懲伊災祥之大致固在昔其明徵然而天道遠人道邇驗善惡之幾先視后德何如耳有禾芊芊明盛之年飛紫芒於堯陌垂金粟於舜田氣緣感而後應治有開而必先以此爲瑞瑞何疑焉若夫帝澤未流嘉禾聿穰搖盲

飈以扶疎潤怪雨而夔對雖併穗之可觀實陰陽之多  
戾出非其時是奚足貴名之曰妖又豈非類故夫麟一  
也遊郊者軒以之光西狩者周以之亡鳳一也岐山鳴  
而德茂穎川集而道荒彼四靈其畢爾豈茲禾之比方  
蓋以瑞稱之兮瑞未可必以妖視之兮妖亦非常亮神  
霄之有意非臧否其茫茫維觀物而考德兮乃天人之  
並彰噫嘻爲妖爲瑞以昏以聖則大聖之握符必降康  
之綦盛方今巢燧當陽夔龍布令步玉斗懸金鏡匹夫  
軫於宸衷三農重於八政春臺若登寒暑皆應是以震  
聲日景霄煜九玄貢華喬岳輸英大川極薰蒸而旁魄  
乃茁暢於天田所謂以和召和兮洵神理之自然豈比

夫赤烏與泰始空詫說於民間昔我高皇帝之紹天也  
虎旅戢而成龍門獻其嘉穗肆賁天章用歌敬畏不  
侈大以自矜爰貽謀而錫類誠天寵其德而靈承其瑞  
於今觀之維上克配而先生不考於此一以爲希覩一  
以爲偶然弗原天而盡人得無立言之少偏伊欲照金  
簡重瑤編表熙朝之鴻鑠邁周烈於千年務昭明乎聖  
德乃論治之真詮文學語旣從容而却先生歛容唯唯  
諾諾顧謂徇華子曰此嘉禾之讜議也足勸賢而警虐  
庶幾風人用備著作

樂章增宋史朝會樂章彼美嘉禾一莖九穗農疇告祥  
史牒書瑞擊壤歡歌如京委積留獻春種昭錫善類

嘉彼合穎致貢升平異標南畝瑞應西成德至於地皇  
祇效靈和同之象煥發祥經

五言排律原唐孟簡咏嘉禾合穎玉燭將成歲封人亦

自歌八方霑聖澤異畝發嘉禾共秀芳何遠連莖瑞且  
多穎低甘露滴影亂惠風過表稔由神化爲祥識氣和  
因知興嗣歲王道舊無頗增無名氏嘉禾合穎天祚

皇王德神呈瑞穀嘉感時苗自秀證道葉方華氣轉騰  
佳色雲披映早霞薰風浮合穎湛露淨祥花六穗垂兼  
倒孤莖嫋復斜應同唐叔獻稱慶比周家

詩散句增周庾信嘉禾雙合穎稻熟再含胎唐張籍

田有嘉穀隴數畝穗亦同宋夏竦晉山遠地蜀山西

九穗嘉禾忽效奇

元王憚嘉禾歲芋芋

佩文齋廣羣芳譜卷第九

佩文齋廣羣芳譜卷第十

穀譜

大豆

按黑豆黃豆皆名大豆原譜分而爲二今從齊民要術併合爲一

**原**豆者莢穀之總名也大者謂之菽

**增**本草大豆有

黑白黃褐青斑數色

**原**黑豆處處有之苗高三四尺

蔓生莖葉蔓延葉團有尖色青帶黑上有小白毛秋開小白花成叢結莢長寸餘多者五六粒亦有一二粒者經霜乃熟緊小者爲雄豆入藥良大者止堪食用作豉及喂牲畜味生則平炒則熱煮則寒作豉主發散造醬及生黃卷平牛食之溫馬食之冷一體之中用之數變小兒以炒豆同猪肉食多壅氣致死十歲以上則無妨

服華麻子及厚朴者並忌炒豆犯之脹滿致死黃豆亦  
有小大二種種耘收穫苗葉莢萁與黑豆無異惟葉之  
色稍淡結角比黑豆稍肥其豆可食可醬可豉可油可  
腐腐之滓可喂猪荒年人亦可充饑油之滓可糞地萁  
可然火葉名藿嫩時可爲茹 **增**廣志有黃落豆有御  
豆 其豆角長有塲豆 葉可食有青有黃者 **齊民要術**今世大  
豆有黑白二種及長梢牛踐之名又有黑高麗豆鷲豆  
大豆類也

**廣雅**

**增**

詩豳風七月亨葵及菽

**小雅**中原有菽庶民

采之 **采菽采菽筐之筐之傳菽所以芼太牢而待君子也****箋**采之者采其葉以爲藿三牲牛羊豕芼以藿王



饗賓客有生俎乃用鉶羹故使采之 **原**大雅藝之苾

菽苳菽蒹蒹 **增**禮記檀弓啜菽飲水盡其歡 **月令**

孟夏之月天子食菽與雞 **注**菽實孚甲堅合屬水雞木

畜時熟食之亦以安性也 **原**左傳周子有兄而無慧

不能辨菽麥 **注**菽大豆也豆麥殊形易別故以爲癡者

之候 **增**戰國策張儀爲秦連橫說韓王曰韓地險惡

山居五穀所生非麥而豆民之所食大抵豆飯藿羹 **注**

藿菽之少者姚云史記後語作飯菽而麥下文亦作菽

古語只稱菽漢以後方呼豆 **史記**周后稷本紀棄爲

兒時屹如巨人之志其遊戲好種樹麻菽麻菽美 **前**

漢書鮑宣傳漿酒藿肉 **注**師古曰藿豆葉也 **楊惲傳**

惲報孫會宗書詩曰田彼南山蕪穢不治種一頃豆落而爲萁人生行樂耳須富貴何時

後漢書馮異傳王

郎起光武自薊東南馳晨夜草舍至饒陽蕪萋亭時天寒烈衆皆饑疲異上豆粥明日光武謂諸將曰昨得公孫豆粥饑寒俱解後帝卽位使中黃門賜以珍寶詔曰倉卒蕪萋亭豆粥滹沱河麥飯厚意久不報

晉書良

吏傳吳隱之介立有清操雖日晏歡菽不饗非其粟

隱逸傳翟莊端居篳門歡菽飲水州府禮命及公車徵並不就

北齊書庠狄伏連傳冬至之日親表稱賀其

妻爲設豆餅伏連問此豆因何而得妻對向於食馬豆中分減充用伏連大怒典馬掌食之人並加杖罰

唐

書韋貫之傳貫之居貧噉豆糜自給〔揚子子有含菽  
縑絮而致滋美其親將以求孝也〕〔列子周諺曰晨出  
夜入自以性之恒噉菽茹藿自以味之極〕〔呂氏春秋  
得時之豆長莖短足其莢二七爲族多枝數節競葉蕃  
實〕〔淮南子河水中濁而宜菽〕〔焦氏易林中原有菽  
以待饗食飲御諸友所求大得〕〔旦樹菽豆暮成藿羹  
心之所樂志快心歡〕〔孝經援神契赤土宜菽〕〔春秋  
佐助期豆神名靈殖姓樂長七尺大目通於時節〕〔原  
東觀漢紀劉平嘗爲餓賊所劫叩頭曰老母饑少氣力  
待平爲命願得還飯食母馳來就死涕泣發於肝膽賊  
卽遣去乃摭三斗豆以謝賊恩〕〔閔貢字仲叔太原人

也與周黨相友黨每過仲叔共啜菽飲水無菜茹

古

今注宣帝元康四年南陽雨豆

世說石崇爲客作豆

粥咄嗟便辦恒冬天得韭萍藿王愷爲搯腕乃密貨崇

帳下都督問所以都督曰豆至難煮唯預作熟末客至

作白粥以投之韭萍藿是搗韭根雜以麥苗爾

增鵲

冠子兩葉蔽目不見泰山雙豆塞耳不聞雷霆

拾遺

記樂浪之東有背明之國宜種百穀有繞明豆其莖弱

自相縈纏有傾離豆言其豆見日葉垂覆地食者不老

不疾

益都耆舊傳朱倉字卿雲之蜀從處士張寧受

春秋糴豆十斛屑之爲糧閉戶精誦寧矜之斂得米二

十石倉不受一粒

爾雅翼八月雨爲豆花雨

源雙

槐歲抄溫陵人家中元前數日以水浸黑豆暴之及芽以糠皮寘盆內鋪沙植豆用板壓長則覆以桶曉則曬之欲其齊而不爲風日損也中元則陳於祖宗之前越三日出之洗焯漬以油鹽苦酒香料可爲茹捲以麻餅尤佳色淺黃名鵝黃豆生弘治乙卯六月黥歙雨豆隆慶六年四月陝西西寧衛天降黑豆徧地人食之則氣閉

**集藻賦** **增** 晉張華豆羹賦乃有孟秋嘉菽垂枝挺英是刈是穫充簞盈篋香鑠和調周疾赴急時御一杯下咽三嘆時在下邑頗多艱難空匱之厄固不輟權追念昔日啜菽永安

**頌增**宋蘇軾食豆粥頌道人親煮豆粥大衆齊念般若  
老夫試挑一口已覺西家作馬

五言古詩**原**魏曹植應詔作煮豆然豆其豆在釜中泣  
本是同根生相煎何太急晉陶潛歸園田居種豆南山下草盛豆苗稀晨興理荒穢帶月荷鋤歸道狹草木長夕露沾我衣衣沾不足惜但使願無違

七言古詩**補**宋蘇軾豆粥君不見滹沱流澌車折軸公  
孫倉皇奉豆粥濕薪破竈自燎衣饑寒頓解劉文叔又  
不見金谷敲冰草木春帳下烹煎昔美人萍蘩豆粥不  
傳法咄嗟而辦石季倫干戈未解身如寄聲色相纏心  
已醉身心顛倒自不知更識人間有真味豈如江頭千

頃雪色蘆芽簷出沒晨煙孤地確舂杭光似玉沙瓶煮  
豆輒如酥我老此身無著處賣書來向東家住臥聽雞  
鳴粥熟時蓬頭曳履君家去方岳豆苗江南之筍天  
下奇春風匆匆催上籬秦郵之薑肥勝肉遠莫達之長  
負腹先生一鉢同僧居別有方法供齋蔬山房掃地布  
豆粒不煩勤荷煙中鋤手分瀑泉灑作雨覆以老瓦如  
穹廬平明發視玉髯磔一夜怒長堪冰苴自親火候瀹  
魚眼帶生芼入晴雲椀碧絲高壓涎滑尊脆響平欺辛  
螯蔞晚菘早韭各一時非時不到詩人脾何如此雋咄  
嗟辦庾郎處貧未爲慣

詩散句

**原**

唐杜甫相攜行豆田秋花靄霏霏

**增**

宋楊

萬里道邊籬落半遮眼白白紅紅徧豆花 唐張九齡

塲藿已成歲 杜甫 豆子雨已熟 宋蘇軾 秋霖暗豆

莢 陸游 宿雨飽豆莢 豆莢雨中肥 林景熙 蟲響

豆花秋 原唐杜甫 南山豆苗早荒穢 增許渾 童子

遙迎種豆歸 溫庭筠 桑竹參差映豆花 宋陸游 籬

實傍籬收豆莢 楊萬里 晚紫豆花初總角 元李孝

光豆遺晨隴茅齊白 明高啓 白豆花開片雨餘 原

孟淑卿 豆花雨過晚生涼

**別錄** 原 種植槐無蟲宜豆夏至前後下種上旬種則花

密莢多宜甲子丙子戊寅壬午及六月三卯日忌西南

風及申卯日肥地宜稀薄地宜密纔出便鋤草淨爲佳



使葉蔽其根不畏旱穫宜晚莢赤莖蒼葉微黃方穫

**增**崔寔月令二月可種大豆又二月昏參夕杏花盛桑

椹赤可種大豆謂之上時四月時雨降可種大小豆

雜陰陽書大豆生於槐九十日秀秀後七十日熟豆生

於申壯於子長於壬老於丑死於寅惡於甲乙忌於卯

午丙丁齊民要術春大豆次植穀之後二月中旬為

上時一畝用子八升三月上旬為中時用子一斗四月上旬為下時

用子一斗歲宜晚者五六月亦得然稍晚稍加種子地不

求熟秋鋒之地即摘種地收刈欲晚此不零落必須耬

下種種欲深故豆性鋒耩各一鋤不過再葉落盡然後刈

葉不盡刈訖則速耕大豆怕雨秋種莢者用麥底一畝

則難治則難治大豆

用子三升先漫散訖犁細淺耨而勞之

旱則糞壅葉落稀則苗莖不高

深則土厚不生

若澤多者先深耕訖逆垡擲豆然後勞之

澤少則否

爲其泥鬱不生

九月中候近地葉有黃落者速刈之

葉少不黃必泥鬱刈

不速逢風則葉落盡遇雨澤爛不成

汜勝之書曰大豆保歲易爲宜古

之所以備凶年也謹計家口數種大豆率人五畝此田

之本也三月榆莢時有雨高田可種大豆土和無塊畝

五升土不和則益之種大豆夏至後二十日尚可種戴

甲而生不用深耕大豆須勻而稀豆花憎見日見日則

黃爛而根焦也

獲豆之法莢黑而莖蒼輒收無疑其

實將落反失之故曰豆熟於塲於塲獲豆卽青莢在上

黑莢在下

汜勝之區種大豆法坎方深各六寸相去

二尺一畝得千六百八十坎其坎成取美糞一升合坎中土攪和以內坎中臨種沃之坎三升水坎內豆三粒覆上土勿厚以掌抑之令種與土相親一畝用種一升用糞十六石八斗豆生五六葉鋤之旱者漑之坎三升水丁夫一人可治五畝至秋收一畝中十六石 **農政全書**種大豆鋤成行壟春穴下種早者二月種四月可食名曰梅豆 **吳下田家志**種豆宜甲子乙丑壬申丙子戊寅壬午壬寅 **原服食博物志**人食豆三年則身重行動難 左慈荒年法用大豆粒細調勻者生熟按之令有光暖徹豆心內先日不食以冷水頓服訖一切魚肉菜果不得復食渴飲冷水初小困十日後體力壯

健不思食。抱朴子相國張文蔚莊內有鼠狼穴，養四子爲蛇所吞，鼠狼雌雄情切，乃於穴外坩土壅穴，俟蛇出頭度其回轉，不便當腰咬斷，而劈腹銜出四子，尚有氣寘於穴外，銜豆葉嚼而敷之，皆活。後人以豆葉治蛇咬，蓋本於此。延年祕錄服大豆，令人長肌膚，益顏色，填骨髓，加氣力，補虛，能食，不過兩劑。大豆五升，如作醬法，取黃搗末，以豬肪煉膏，和丸，梧子大，每服五十丸，至白丸溫酒下，神驗祕方也。肥人忌服。輟耕錄黃山谷煮豆帖云：煮黑豆法，確豆一升，按莎極淨，用貫衆一斤，細剉如骰子，同豆斟酌水多少，慢火煮，豆香熟日乾之，翻覆令展盡餘汁，簸取黑豆，去貫衆，空心日嚼五七粒。

食百草木枝葉皆有味可飽也

荆湖近事陶華以鹽

煮黑豆常食之云能補腎蓋豆乃腎之穀其形類腎黑色通腎引之以鹽所以妙也 李守愚侵晨井華水吞黑豆五七粒謂之五臟穀至老視聽不衰 製用六月六日以洗淨大黃豆煮熟取出候冷以麩爲衣攤於席上以衣蓋之又用青蒿掩一七取出曬乾搓去麩黃入缸煎紫蘇鹽湯候冷浸豆與水平每豆一斤用鹽六兩浸過一夜取出和食香拌勻裝淨罈內令日曬四五日從新搜過一次再曬再搜四五次用

附錄 穉豆

**原** 穉豆

本草云穉乃自生稻名此豆野生故名

一名登豆 一名登菽 一名

穉豆

八

治豈一名鹿豆一名驢豆黑豆中最細者卽黑小豆也  
野生今下地亦種之小科細粒葉如葛霜後熟可蒸食  
甘溫無毒炒焦黑熟投酒中治產後冷血

赤小豆

按廣雅云小豆荅也統而名之也齊民要術云小豆有綠赤白三種

留豆亦其類也今照本草分別於後

**原**赤小豆一名赤豆一名紅豆處處種之夏至後下種

苗高尺許葉本大末尖至秋開花淡銀褐色有腐氣莢  
長二三寸比綠豆莢稍大色微白帶紅三青二黃時卽  
收之可煮可炒可粥飯可作麩食餽並良久服則津血  
滲洩令人肌瘦身重合魚鮓食成消渴其稍大而鮮紅  
淡紅者止可食用色赤黯而粒緊小者人藥甘酸平無

毒心之穀也性下行能入陰分行津液利小便消脹除  
腫止吐治下痢腸澼解酒病除寒熱排膿散血通乳汁  
下胞衣利產難水氣脚氣最爲急需花名赤腐婢解酒  
毒明目下水治小兒丹毒葉去煩熱煮食明目

**彙考**

**原**吳志趙達傳達治九宮一算之術使人取小豆

數升播之席上立處其數驗覆果信

**晉書郭璞傳**璞

至廬江愛主人婢無由而得乃取小豆三升繞主人舍  
散之主人晨見赤衣人數千圍其家就視則滅甚惡之  
請璞爲卦璞曰君家不宜畜此婢可於東南三十里賣  
之慎勿爭價則此祟可除主人從之

**歲時雜記**共工

氏有不才子以冬至日死爲疫鬼畏赤豆故是日作赤

豆粥厭之。田家五行十二月二十五日夜煮赤豆粥，大小人口皆食之。在外之人亦留分以俟其歸，謂之口數粥，亦驅瘟鬼之意。

**別錄** 齊民要術：赤豆三月種，六月旋摘；遲者四月種，亦可宜稀稠得所，太密不實。

綠豆

**真** 綠豆

本草云：綠以色名也。舊作葉非。

圓小者佳，大者名植豆，功用頗

同。四月下種，苗高尺許，葉小而毛，至秋開小白花，莢長二三寸，比赤豆莢微小有二種，粒麤而色鮮者爲官綠，又名明綠，皮薄粉多，粒小而色暗者爲油綠，又名灰綠，皮厚粉少，早種者名摘綠，可頻摘也；遲種者名拔綠。



一拔而已其用甚廣可作豆粥豆飯豆酒燻食炒食水  
泡磨爲粉澄濾作餌蒸糕盪皮壓索爲食中要物亦可  
喂牲畜眞濟世良穀也性甘寒無毒肉平皮寒用宜連  
皮解金石砒霜草木一切諸毒生研新汲水服反樞子  
穀害人合鯉魚鮮食久則令人肝黃成渴病花及芽解  
酒毒莢治赤痢

**彙考** **增** 湖山野錄 眞宗深念稼穡聞占城稻耐旱西天

菘豆子多而粒大各遣使以珍貨求其種占城得種二  
十石至今在處播之西天中印土得菘豆種二石不知  
今之菘豆是否始植於後苑秋成日宣近臣嘗之仍賜  
占稻及西天菘豆御詩 孫公談圃張文定嘗苦腳疾

無藥可療一日遊相國寺有賣藥者得菘豆兩粒服之遂愈 **原**唐公之夔號抱一西粵人也言其地無綠豆每承舍入京包中止帶斗餘多則至某江輒遇風浪不能渡到彼中比於藥物凡患時疾者用等秤買一家煮豆香味四達兩鄰對門患病人聞其氣輒愈

**別錄原**種植綠豆宜刈了麻地上種之太早不生莢若其年李不蛀則豆有收忌卯日下種 **增**種樹書種菘

豆地宜瘦四月種六月收子再種八月又收 **原**製用

豆蠶先取濕沙納糞器中以綠豆勻撒其上如種藝法深桶覆藏室中勿令見風日一次掬水灑透俟其苗長可尺許摘取蟹眼湯綽過以料蠶俱之赤豆亦可然不

如綠豆之佳

白豆

**原**白豆一名飯豆小豆之白者也亦有土黃色者大如綠豆而差長粥飯皆可用四五月種苗葉似赤小豆而微尖嫩者可作菜亦可生食味甘平調中補五臟暖腸胃腎之穀也腎病宜食浙東一種味更勝作醬作腐極佳北方水白豆相似而不及 **增**本草一種藜豆葉如大豆亦其類也

豌豆

**原**豌豆

本草綱目云其苗柔弱宛宛故得豌豆名豌豆舊作登音劍

一名胡豆

本草經云張騫

使外國得胡豆種

一名戎菽

爾雅云戎菽謂之荏菽注云卽胡豆管子云桓公伐山戎以戎菽編

黃草考譜

穀譜四

白豆

豌豆

二

布於一名畢豆

崔寔月令作𧄸豆廣雅

一名青小豆

名青斑豆一名麻累

本草綱目云嫩時青色

一名回鶻

唐書云畢豆出回鶻地飲膳

一名淮豆

農書云俗呼豌豆大者爲淮豆

一名國豆

鄴中記云石勒改爲國豆

種出西戎北土甚多八九月下

種亦有春種者蔓生有鬚葉似蒺藜葉兩兩相對嫩時

可食三四月開小花如蛾形淡紫色結莢形圓長寸許

子圓如藥丸嫩時可煑食老則可炒食可作麪食餠磨

粉麪甚白而細膩出西戎者大如杏仁百穀之中最爲

先熟又耐久藏宜多種可和醬作滌豆去黥黯令面光

澤亦可喂馬性甘平無毒調營衛平氣益中治消渴淡

煑食之良煑食殺鬼毒心病下乳汁研末塗癰腫痘瘡

**集藻狀增**唐陸贄請依京兆所請折納事狀京兆府先

奏當管蟲食豌豆全然不收請據數折納大豆奉勅宜依度支續奏稱據時估豌豆每斗七十價已上大豆每斗三十價已下京兆府所請將大豆替豌豆望令各據估計錢數折納則冀免損官司者求瘼救災國之令典求瘼在知其所患救災在恤其所無只如螟域爲殃豌豆全損檢覆若非虛謬地稅固合免徵直道而行大體斯在司府折納充數已爲尅下從權度支準估計錢乃是幸災規利所得無幾其傷實多傷風得財非謂理道且豌豆爲物入用甚微舊例所支唯充畜料準數迴給大豆諸司誰曰不然計價剩徵義將安在理無所據事

不可從望依前勅處分未審可否

**別錄增**農政全書玄扈先生曰豌豆與蠶豆各種蠶豆

之利倍於豌豆十倍其耐陳則一也

**蠶豆**

以下四種原列蔬譜今從本草移入於此

**源**蠶豆一名胡豆

本草綱目云豆莢狀如老蠶故名王禎農書謂其蠶時始熟故名亦通吳

瑞本草以此為豌豆誤矣此種豆亦自西胡來雖與豌豆同名同時種而形性迥別太平御覽云張騫使外國得胡豆種歸指此也今蜀人呼此為胡豆而豌豆不復名胡豆矣南北皆有蜀中尤多

八月下種冬生嫩苗可茹莖方而肥中空葉狀如匙頭圓而下尖而綠背白柔厚一枝三葉二月開花如蝶狀紫白色結莢連綴蜀人收其子備荒性甘微辛平無毒快胃和臟腑解酒毒誤吞金銀等物者用之皆效

**集藻** 七言律詩 **增** 宋楊萬里招陳益之李兼濟二主管

小酌益之指蠶豆云未有賦者戲作七言翠莢中排淺  
碧珠甘欺崖蜜軟欺酥沙瓶新熟西湖水漆欄分嘗曉  
露腴味與櫻梅三益友名因蠶繭一絲絢老夫稼圃方  
雙學譜入詩中當稼書

**別錄** **增** 農桑通訣蠶豆百穀之中最爲先登 農政全

書玄扈先生曰蠶豆種花田中冬天不拔花枯用以拒  
霜至清明後拔之 蠶豆八月初種臘月宜厚壅之此  
種極救農家之急且蝗所不食

豇豆

**原** 豇豆一名豨蠶 音絳雙本草綱目云此豆紅色居多  
莢必雙生故有豇豨蠶之名廣雅指

豨蠶豆 豇豆

為胡豆 處處有之穀兩前後下種者六月子便可種一  
誤矣 年可兩收四月種者七八月收一種蔓長丈餘一種蔓  
短懸架則蕃鋪地則不甚旺宜灰壅其葉俱本大末尖  
嫩時可茹其花有紅白二色莢有白紅紫赤斑駁數色  
長者至二尺生必兩兩並垂有習坎之義子微曲如人  
腎形所謂豆為腎穀者宜以此當之性甘鹹無毒理中  
益氣補腎健胃和五臟調營衛生精髓止消渴吐逆泄  
痢小便數與諸疾無禁但水腫忌補腎不宜多食此豆  
嫩時充菜老則收子可穀可果可菜取用最多豆中上  
品也

**別錄原**本草昔盧廉夫教人補腎氣每日空心煮豇豆



入少鹽食之大有益  
袖珍方中鼠莽毒者以豇豆汁  
飲卽解欲試者先刈鼠莽苗以汁潑之使根爛不生此  
則物理然也

附錄  
黎豆

原黎豆一名狸豆一名黎沙一名獵沙見古注其大者名

虎豆亦名虎沙爾雅云攝虎巢注云今虎豆江東呼爲

古人謂藤爲巢後人訛巢爲狸矣又云黎黑色也此豆

莢老則黑色有毛露筋如虎狸指爪其子亦有黠如虎

狸之斑煖之汁野生山中人亦有種之者三月下種生

黑故有諸名  
蔓葉如豇豆但文理偏斜六七月開花成簇紫色狀如

扁豆花一枝結莢十餘長三四寸大如拇指有白茸毛

老則黑而露筋宛如乾熊指爪之狀其子大如刀豆淡

紫色有斑點如狸文煮去黑汁同豬雞肉再煮食味乃佳

附錄馬豆

**摶**古今注馬豆一名馬沙似虎豆而小實大如指亦可食也

**藥考**雲仙散錄品物類聚曰白馬豆食之齒齲虢國夫人厨吏鄧連以洗豆皮作靈沙曜供翠鴛堂

菡豆

**原**菡豆一名沿籬豆一名蛾眉豆本草云菡本作扁莢形扁也沿籬蔓延也

蛾眉象豆脊白路之形也二月種蔓生人家多種之籬邊或以竹木架起每又三枝一居頂二對生一枝三葉亦一居頂二

對生葉大如杯圓而有尖花有紫白二色狀如小蛾有  
翅尾形莢生花下花卸而莢現及老長寸餘有青白二  
色形凡十餘樣或長或團或如龍爪虎爪或如豬耳刀  
鎌種種不同皆纍纍成枝一枝十餘莢成穗白露後實  
更繁衍子有黑白赤斑四色圖經本草云黑者名鵲豆蓋以其黑間有白道如鵲羽也每莢子或一或二或三一種莢硬不堪食惟豆子麤圓  
而色白者可入藥微炒用氣味甘微溫無毒和中下氣  
消暑暖脾胃除濕熱止消渴解酒毒河豚魚毒一切草  
木毒

**集藻****增**明王伯稠涼生豆花豆花初放晚涼淒碧葉陰

中絡緯嘯貪與鄰翁棚底話不知新月照清溪

**別錄原**月令廣義芒種前扁豆開花主水 種植清明

下種以草灰蓋之不用土覆芽長分栽搭棚引上 **增**

農政全書玄扈先生曰以口向上種之粒粒出若扁種

十不出一蓋豆瓣重頂土不起故爛

刀豆

**原**刀豆一名挾劍豆 拾遺記云樂浪之東有融澤有挾劍豆其莢形似人挾劍橫斜而生

此即人家多種之蔓引一二丈葉如豇豆葉而稍長大五

六七月開紫花結莢長者近尺微似早莢扁而劍脊三

稜嫩青煑食醬醃蜜煎皆佳老則微黑子大如拇指頂

淡紅色同雞猪肉煑食甚美氣味甘平無毒溫中下氣

利腸止飢逆益腎補元

**別錄原**本草綱目一人病後飢逆不止聲聞鄰家或令取刀豆燒存性白湯調服二錢卽止此亦取其下氣歸元而逆自止也種植將地鋤鬆深半尺熟糞拌勻清明時先用布濕微水潤豆令脹將見芽鋤前土作穴每穴一粒側放入不可深此豆體重深則難出上用鋸末拌土薄蓋一層一云用草灰日日澆令濕俟生蔓竹木架起

大靈豆

**貴耳錄**大靈豆華山陳搏有靈豆服一粒四十九日不饑筋力如故顏色若嬰兒世罕得服之者

木豆

**增**交州記木豆出徐僮間子美似烏頭大葉似柳一年種數年採

靈光豆

**增**杜陽雜編大曆中日林國獻靈光豆大小類中國之菘豆其色紅而光芒長數尺本國人呼爲詰多珠和石上菖蒲葉煮之卽大如鶩卵其中純紫稱之可重一斤已上啖之香美無比數日不復言饑渴

佛豆

**增**益部方物畧記佛豆粒甚大而堅農夫不甚種唯圃中蒔以爲利以鹽漬食之小兒所嗜

**集藻**

**贊**

**增**

宋宋祁佛豆贊豐粒茂苗豆別一類秋種春

斂農不常蒔

脂麻

**原**

脂麻俗作芝麻者非

一名油麻 一名胡麻

夢溪筆談云胡麻直是今油麻張騫

始自大宛得油麻之種故名胡麻以別中國一名巨勝

之大麻也本草云油麻脂麻謂其多脂油也一名方莖

本草云巨勝即胡麻一名方莖以莖一名狗蝨以形一名藤弘

見廣雅本草云藤一名交麻杜預拾遺記云隋大業中收為交麻

陶弘景曰胡麻八穀之中惟此為良李時珍曰脂麻有早晚二種黑白赤三色莖皆方高者三四尺葉光澤有

本團而末銳者有本團而末分三了如鴨掌形者葛洪

謂一葉兩尖為巨勝蓋不知烏麻白麻皆有二種葉也

秋開白花似牽牛花而微小亦有帶紫艷者節節生枝

結角長者寸許四稜六稜者房小而子少七稜八稜者房大而子多皆隨地肥瘠蘇恭謂四稜爲胡麻八稜爲巨勝謂其房大勝諸麻也其枝四散者角繁子多一莖獨上者角稀子少取油以白者爲勝可以烹煎可以然點服食以黑者爲良胡地者子肥大其紋鵲其色紫黑取油亦多尤妙其色黑入腎能潤燥也赤者狀如老茄子錢乙治痘瘡變黑歸腎用赤脂麻煎湯送百祥丸取其解毒耳

**彙考**拾遺記樂浪之東有背明之國宜種百穀有通明麻食者夜行不持燭是苣勝也食之延壽後天而老

**原**神仙傳魯女生長樂人初餌胡麻及木絕穀八十



餘年日少壯色如桃花日能行三百里走及驛鹿

**增**

雞肋篇胡麻俗呼芝麻言其性有八拗謂雨暘時薄收

大旱方大熟開花向下結子向上炒焦壓榨才得生油

藁車則滑鑽鍼乃澀也

**本草**俗傳胡麻須夫婦同種

則茂盛故本事詩云胡麻好種無人種合是歸時底不

歸

**原**天台志

劉晨阮肇入天台採藥失道食盡見桃

實食之覺身輕行數里至溪澗持杯取水見一杯流出

有胡麻飯溪邊二女子笑曰劉阮二郎捉向所失流杯

來便迎歸作食既出無復相識至家子孫已七世矣

**集藻**賦**增**宋蘇軾服胡麻賦并序始余嘗服伏苓久之

良有益也夢道士謂余伏苓燥當雜胡麻食之夢中問

道士何者爲胡麻道士言脂麻是也旣而讀本草云胡麻一名狗蝨一名方莖黑者爲巨勝其油正可作食則胡麻之爲脂麻信矣又云性與伏苓相宜於是始異斯夢方將以其說食之而子由賦伏苓以示余乃作服胡麻賦以答之世間人聞服脂麻以致神仙必大笑求胡麻而不可得則必求山苗野草之實以當之此古所謂道在邇而求諸遠者歟其詞曰我夢羽人頽而長兮惠而告我藥之良兮喬松千尺老不僵兮流膏入土龜蛇藏兮得而食之壽莫量兮於此有草衆所嘗兮狀如狗蝨其莖方兮夜炊晝曝久乃臧兮伏苓爲君此其相兮我興發書若合符兮乃瀹乃蒸甘且腴兮補填骨髓流

髮膚兮是身如雲我何居兮長生不死道之餘兮神藥  
如蓬生爾廬兮世人不信空自劬兮搜抉異物出怪迂  
兮槁死空山固其所兮至陽赫赫發自坤兮至陰肅肅  
躋於乾兮寂然反照珠在淵兮沃之不滅又不燔兮長  
虹流電光燭天兮嗟此區區何與於其間兮譬之膏油  
火之所傳而已耶元戴表元胡麻賦六月亢旱百稼  
槁乾有物沃然秀於中田是爲胡麻外白中玄嘻微心  
之良苦徵日御而周旋朝舒翹以東嚮夕偃媠而西遷  
若餞迎之有節閱旦旦而不愆有一儒者睹而異之曰  
是物其有識可比義於戎葵惟太陽之委照疇一物之  
得遺彼茫然以自遂有得氣而不知獨輸勤於畎畝致

展轉於遐暉迹其華粲粲以淡成榦亭亭而直致陰回  
翔以蓋屬膏湛淳而珠媚疑本質之過清常疑溫而抱  
粹庸遇曠以不傷表孤妍於衆悴且其芘本近仁嚮明  
近智蹈約而不移近信在困而能恭近義故論胡麻者  
以爲君子之道四宜乎以爾登良醫之篋衍依飛仙之  
服餌也

詩散句

**原**

唐王維御羹和石髓香飯進胡麻

**增**

宋梅

堯臣傍枝延扶疎脩莢繁橐韜

胡麻養氣血種以督

兒曹

**原**

明馮琦居然在玄圃不必飯胡麻

**增**

唐曹

唐白羊成隊難收拾吃盡溪邊巨勝花

宋陸游胡麻

刈罷下齏初引水家家灌晚蔬

欲曬胡麻愁屢雨

**別錄原**種植須肥地荒地亦可但多加糞二三月爲上

時四月上旬爲中時五月上旬爲下時望前種實多而成望後種子少多糝每畝二升取沙土中拌和之則入地勻須多種宜甲子壬申丙子壬午及六月三卯日忌南風及辛亥寅未日〔收割鋤三四遍逾多逾妙頻鋤草淨簡熟者先獲束欲小大則難乾五六束一攢斜倚之使風得入候口開以小杖微打令子出仍攢之三日一打四五遍乃淨曬乾收藏〕〔服食抱朴子云用上黨胡麻三斗淘淨甑蒸令氣徧日乾以水淘去沫再蒸如此九度以湯脫去皮簸淨炒香爲末白蜜棗膏丸彈子大每服溫酒化下一丸日三忌毒魚狗肉生菜服至百

日除一切痼疾一年身面光澤不饑二年白髮返黑三年齒落更生四年水火不能害五年行及奔馬若欲下之飲葵菜汁 孫真人云用胡麻三升去黃褐者蒸三十遍微炒香爲末入白蜜三升杵三百下丸桐子大每日服五十九人過四十以上久服明目洞視腸柔如筋

取用漬汁和麪至韌滑人身生肉丁者擦之卽愈七月七日采烏麻花最上頭者陰乾爲末烏麻油漬之蒼毛不生者日塗之卽生又生禿髮 稽入米倉內米不蛀燒灰入點痣及去惡肉方中用除夜撒之房臥內外云可避邪又生脂麻單條者名霸王鞭墜臥房前亦云可祛鬼 葉湯浸良久涎出稠黃色婦人用梳頭沐髮

去風 冢塾事親油生竿者良有潤燥解毒止痛消腫之功蒸炒者止可食用及然點不堪入藥入藥以烏麻油爲上白麻油次之須自竿者可用市者恐僞臘月油久放不壞點燈照蠶辟蟲熬膏藥極效搽婦人頭髮黑光不臭不生蟻虱 麻餅竿去油麻滓也亦名麻粩可食荒歲人以救饑入鹽作醬甚滑膩又可養魚肥田周禮堅強用黃亦此義也 **增**好事集以胡麻麪啖犬則光黑而駿使獵必大獲又可得三十歲 物類相感志芝麻蕘燒煙熏紙被不作聲

附錄 青囊

**原**青囊一名夢神一名胡麻巨勝苗也一作葉服食家

作菜用其法秋間取巨勝子種肥地畦中如種菜法苗出鋤令無草乾卽灌水采食滑美如葵

附錄亞麻

**增**本草亞麻一名鴟麻一名壁虱胡麻蘇頌曰出兗州威勝軍苗葉俱青花白色李時珍曰陝西人亦種之其實亦可榨油然燈氣惡不堪食